

二十四史輯要

冊九



# 國 恥 史

## 國 恥 小 史

二冊 一角半

是書將我國歷年外交上失敗之痛史，分別記述。並附地圖，尤便檢查，一般國民，不可不讀。

## 國 恥 史

一冊 一元二角

本書採用紀事本末體裁，詳述明清以來中國受外人逼迫之真相；如鴉片、英法聯軍之戰，中英、中日、八國聯軍之戰，及各國無理要挾欺騙訂立各項不平等條約，暨歷次交涉失敗之情形，無不載備。

## 中 國 國 恥 地 圖

一幅 一角

是圖以我國盛時之版圖爲底本，將歷次喪失之領土領海加以標記說明，閱之眙目驚心，愛國者允宜家置一幅。

中 華 書 局 發 行

# 二十四史輯要

## 卷之四十 唐

高祖 新唐書

高祖神堯大聖大光孝皇帝諱淵字叔德姓李氏隴西成紀人也其七世祖暹當晉末據秦涼以自王是爲涼武昭王暹生歆歆爲沮渠蒙遜所滅歆生重耳魏弘農太守重耳生熙金門鎮將戍于武川因留家焉熙生天賜爲幢主天賜生虎西魏時賜姓大野氏官至太尉與李弼等八人佐周代魏有功皆爲柱國號八柱國家周閔帝受魏禪虎已卒乃追錄其功封唐國公諡曰襄襄公生昉襲封唐公隋安州總管柱國大將軍卒諡曰仁仁公生高祖於長安體有三乳性寬仁襲封唐公隋文帝獨孤皇后高祖之從母也以故文帝與高祖相親愛文帝相周復高祖姓李氏以爲千牛備身事隋譙隴二州刺史大業中歷岐州刺史滎陽樓煩二郡太守召爲殿內少監衛尉少卿煬帝征遼東遣高祖督運糧於懷遠鎮楊玄感將反其兄弟從征遼者皆逃歸高祖先覺以聞煬帝遽班師以高祖爲弘化留守以禦玄感詔關右諸郡兵皆

受高祖節度是時隋政荒天下大亂煬帝多以猜忌殺戮大臣嘗以事召高祖高祖遇疾不時謁高祖有甥王氏在後宮煬帝問之王氏對以疾煬帝曰可得死否高祖聞之益懼因縱酒納賂以自晦十一年拜山西河東慰撫大使擊龍門賊母端兒射七十發皆中賊敗去而斂其尸以築京觀盡得其箭於其尸又擊絳州賊柴保昌降其衆數萬人突厥犯塞高祖與馬邑太守王仁恭擊之隋兵少不敵高祖選精騎二千爲遊軍居處飲食隨水草如突厥而射獵馳騁示以閒暇別選善射者伏爲奇兵虜見高祖疑不敢戰高祖乘而擊之突厥敗走十三年拜太原留守擊高陽歷山飛賊甄翟兒於西河破之是時煬帝南遊江都天下盜起高祖子世民知隋必亡陰結豪傑招納亡命與晉陽令劉文靜謀舉大事計已決而高祖未之知欲以情告懼不見聽高祖留守太原領晉陽宮監而所善客裴寂爲副監世民陰與寂謀寂因選晉陽宮人私侍高祖高祖過寂飲酒酒酣從容寂具以大事告之高祖大驚寂曰正爲宮人奉公事發當誅爲此爾世民因亦入白其事高祖初陽不許欲執世民送官已而許之曰吾愛汝豈忍告汝邪然未有以發而所在盜賊益多突厥數犯邊高祖兵

出無功煬帝遣使者執高祖詣江都高祖大懼世民曰事急矣可舉事已而煬帝復馳使者赦止高祖其事遂已是時劉武周起馬邑林士弘起豫章劉元進起晉安皆稱皇帝朱粲起南陽號楚帝李子通起海陵號楚王邵江海據岐州號新平王薛舉起金城號西秦霸王郭子和起榆林號永樂王竇建德起河閒號長樂王王須拔起恆定號漫天王汪華起新安杜伏威起淮南皆號吳王李密起鞏號魏公王德仁起鄴號太公左才相起齊郡號博山公羅藝據幽州左難當據涇馮盎據高羅皆號總管梁師都據朔方號大丞相孟海公據曹州號錄事周文舉據淮陽號柳葉軍高開道據北平張長懋據五原周洸據上洛楊士林據山南徐圓朗據兗州楊仲達據豫州張善相據伊汝王要漢據汴州時德叡蔣尉氏李義滿據平陵綦公順據青萊淳于難據文登徐師順據任城蔣弘度據東海王薄據齊郡蔣善合據鄆州田留安據章丘張青特據濟北臧君相據海州殷恭遂據舒州周法明據永安苗海潮據永嘉梅知巖據宣城鄧文進據廣州俚酋楊世略據循潮冉安昌據巴東寧長真據鬱林其別號諸盜往往屯聚山澤而劉武周攻汾陽宮高祖乃集將吏告曰今吾爲留守

而賊據離宮縱賊不誅罪當死然出兵必待報今江都隔遠後期奈何將吏皆曰國家之利可專者公也高祖曰善乃募兵旬日間得衆一萬副留守虎賁郎將王威虎牙郎將高君雅見兵大集疑有變謀因禱雨晉祠以圖高祖高祖覺之乃陰爲備五月甲子高祖及威君雅視事開陽府司馬劉政會告威君雅反卽坐上執之丙寅突厥犯邊高祖令軍中曰人告威君雅召突厥今其果然遂殺之以起兵遣劉文靜使突厥約連和六月己卯傳檄諸郡稱義兵開大將軍府置三軍以子建成爲隴西公左領軍大都督左軍隸焉世民爲燉煌公右領軍大都督右軍隸焉元吉爲姑臧公中軍隸焉裴寂爲長史劉文靜爲司馬石艾縣長殷開山爲掾劉政會爲屬長孫順德王長諧劉弘基竇琮爲統軍開倉庫賑窮乏七月壬子高祖杖白旗誓衆於野有兵三萬以元吉爲太原留守癸丑發太原甲寅遣將張綸徇下離石龍泉文城三郡丙辰次靈石營於賈胡堡隋虎牙郎將宋老生屯於霍邑以拒義師丙寅隋鷹揚府司馬李軌起武威號大涼王八月辛巳敗宋老生於霍邑丙戌下臨汾郡辛卯克絳郡癸巳次龍門突厥來助隋驍衛大將軍屈突通守河東絕津梁壬寅馮翊賊孫華

土門賊白玄度皆具舟以來逆九月戊午高祖領太尉加置僚佐以少牢祀河乃濟  
甲子次長春宮丙寅隴西公建成劉文靜屯永豐倉守潼關燉煌公世民自渭北徇  
三輔從父弟神通起兵於鄠柴氏婦高祖女也亦起兵於司竹皆與世民會鄆賊丘  
師利李仲文蓋屋賊何潘仁向善思宜君賊劉炅等皆來降因略定鄠杜壬申高祖  
次馮翊乙亥燉煌公世民屯阿城隴西公建成自新豐趨霸上丙子高祖自下邳以  
西所經隋行宮苑籞悉罷之出宮女還其家十月辛巳次長樂宮有衆二十萬隋留  
守衛文昇等奉代王侑守京城高祖遣使諭之不報乃圍城下令曰犯隋七廟及宗  
室者罪三族丙申隋羅山令蕭銑自號梁公十一月丙辰克京城命主符郎宋公弼  
收圖籍約法十二條殺人劫盜背軍叛者死癸亥遙尊隋帝爲太上皇立代王爲皇  
帝大赦改元義寧甲子高祖入京師至朝堂望闕而拜隋帝授高祖假黃鉞使持節  
大都督內外諸軍事大丞相錄尚書事進封唐王以武德殿爲丞相府下教曰令視  
事於虔化門十二月癸未隋帝贈唐襄公爲景王仁公爲元王夫人竇氏爲唐國妃  
諡曰穆以建成爲唐國世子世民爲唐國內史徙封秦國公元吉爲齊國公丞相府



置長史司錄以下官趙郡公孝恭徇山南甲辰雲陽令詹俊徇巴蜀二年正月丁未  
隋帝詔唐王劔履上殿入朝不趨贊拜不名加前後羽葆鼓吹戊午周洸降戊辰世  
子建成爲左元帥秦國公世民爲右元帥徇地東都二月己卯太常卿鄭元璿定樊  
鄧使者馬元規徇荆襄三月己酉齊國公元吉爲太原道行軍元帥乙卯世民徙封  
趙國公丙辰隋右屯衛將軍宇文文化及弒太上皇於江都立秦王浩爲皇帝吳興郡  
守沈法興據丹陽自稱江南道總管樂安人盧祖尙據光州自稱刺史戊辰隋帝進  
唐王位相國總百揆備九錫唐國置丞相等官立四廟四月己卯張長慈降辛巳停  
竹使符班銀菟符五月乙巳隋帝命唐王冕十有二旒建天子旌旗出警入蹕甲寅  
王德仁降戊午隋帝遜於位以刑部尙書蕭造司農少卿裴之隱奉皇帝璽紱於唐  
王三讓乃受武德元年五月甲子卽皇帝位於太極殿命蕭造兼太尉告於南郊大  
赦改元賜百官庶人爵一級義師所過給復三年其餘給復一年改郡爲州太守爲  
刺史庚午太白晝見隋東都留守元文都及左武衛大將軍王世充立越王侗爲皇  
帝六月甲戌趙國公世民爲尙書令裴寂爲尙書右僕射知政事劉文靜爲納言隋

民部尙書蕭瑀丞相府司錄叅軍竇威爲內史令丙子太白晝見己卯追諡皇高祖曰宣簡公皇曾祖曰懿王皇祖曰景皇帝廟號太祖祖妣梁氏曰景烈皇后皇考曰元皇帝廟號世祖妣獨孤氏曰元貞皇后妃竇氏曰穆皇后庚辰立世子建成爲皇太子封世民爲秦王元吉齊王癸未薛舉寇涇州秦王世民爲西討元帥劉文靜爲司馬太僕卿宇文明達招慰山東乙酉奉隋帝爲鄴國公詔曰近世時運遷革前代親族莫不夷絕歷數有歸實惟天命興亡之效豈伊人力前隋蔡王智積等子孫皆選用之癸巳禁言符瑞者辛丑竇威薨黃門侍郎陳叔達判納言將作大匠竇抗兼納言七月壬子劉文靜及薛舉戰於涇州敗績乙卯郭子和降庚申廢隋離宮八月壬申劉文靜除名戊寅約功臣恕死罪辛巳薛舉卒壬午李軌降甲申巖州刺史王德仁殺招慰使宇文明達以反己丑秦王世民爲西討元帥以討薛仁果庚子贈隋太常卿高潁上柱國鄴國公上柱國賀若弼杞國公司隸大夫薛道衡上開府臨河縣公刑部尙書宇文弼上開府平昌縣公左翊衛將軍董純柱國狄道公右驍衛將軍李金才上柱國申國公左光祿大夫李敏柱國觀國公諸遭隋枉殺而子孫被流

者皆還之九月乙巳慮囚始置軍府癸丑改銀菟符爲銅魚符甲寅秦州總管竇軌及薛仁杲戰敗績辛未宇文化及殺秦王浩自稱皇帝十月壬申朔日有食之己卯李密降壬午朱粲陷鄧州刺史呂子臧死之乙酉邵江海降己亥盜殺商州刺史泉彥宗辛丑大閱是月竇抗罷十一月竇建德敗王須拔於幽州須拔亡入於突厥乙巳涼王李軌反戊申禁獻侏儒短節小馬庠牛異獸奇禽者己酉秦王世民敗薛仁杲執之癸丑行軍總管趙慈景攻蒲州隋刺史堯君素拒戰執慈景癸亥秦王世民俘薛仁杲以獻十二月壬申世民爲太尉丙子蒲州人殺堯君素立其將王行本辛巳鄭元璫及朱粲戰於商州敗之乙酉如周氏陂丁亥至自周氏陂庚子光祿卿李密反伏誅是歲高開道陷漁陽號燕王

二年正月甲子陳叔達兼納言詔自今正月五月九月不行死刑禁屠殺丙寅張善相降己巳楊士林降二月乙酉初定租庸調法令文武官終喪丙戌州置宗師一人甲午赦并浩介石四州賈胡堡以北繫囚閏月竇建德陷邢州執總管陳君賓辛丑竇建德殺宇文化及於聊城朱粲降壬寅皇太子及秦王世民裴寂巡於畿縣乙巳

御史大夫段確勞朱粲於菊潭庚戌徵行察風俗乙卯以穀貴禁關內屠酤左屯衛將軍何潘仁及山賊張子惠戰於司竹死之丁巳慮囚庚申驍騎將軍趙欽王娑羅及山賊戰於熬屋死之丁卯王世充陷殷州陟州刺史李育德死之三月甲戌王薄降庚辰蔣弘度徐師順降丁亥竇建德陷趙州丁酉李義滿降四月綦公順降庚子并州總管齊王元吉及劉武周戰於榆次敗績辛丑朱粲殺段確以反乙巳王世充廢越王侗自稱皇帝癸亥陷伊州執總管張善相五月庚辰涼州將安修仁執李軌以降癸未曲赦涼甘瓜鄯肅會蘭河廓九州六月王世充殺越王侗戊戌立周公孔子廟於國子監庚子竇建德陷滄州丁未劉武周陷介州癸亥裴寂爲晉州道行軍總管離石胡劉季貞叛陷石州刺史王儉死之七月壬申徐圓朗降八月丁酉鄴國公薨甲子竇建德陷洛州執總管袁子幹九月辛未殺戶部尙書劉文靜李子通自稱皇帝沈法興自稱梁王丁丑杜伏威降裴寂及劉武周戰於介州敗績右武衛大將軍姜寶誼死之庚辰竇建德陷相州總管呂珉死之辛巳劉武周陷并州庚寅太白晝見竇建德陷趙州執總管張志昂乙未京師地震梁師都寇延州鄜州刺史梁

禮死之十月己亥羅藝降乙卯如華陰赦募士背軍者壬戌劉武周寇晉州永安王  
孝基及工部尙書獨孤懷恩陝州總管于筠內史侍郎唐儉討之甲子祠華山是月  
夏縣人呂崇茂反秦王世民討劉武周一月丙子竇建德陷黎州執淮安王神通  
總管李世勣十二月丙申獵於華山永安王孝基及劉武周戰於下邳敗績壬子大  
風拔木

三年正月己巳獵於渭濱戊寅王行本降辛巳如蒲州癸巳至自蒲州二月丁酉京  
師西南地有聲庚子如華陰甲寅獨孤懷恩謀反伏誅辛酉檢校隰州總管劉師善  
謀反伏誅三月庚午改納言爲侍中內史令爲中書令甲戌中書侍郎封德彝兼中  
書令乙酉劉季真降四月丙申祠華山壬寅至自華陰癸卯禁關內諸州屠甲寅秦  
王世民及宋金剛戰於雀鼠谷敗之辛酉王世充陷鄧州總管雷四郎死之壬戌秦  
王世民及劉武周戰於洛州敗之武周亡入於突厥克并州五月壬午秦王世民屠  
夏縣六月丙申赦晉隰潞并四州癸卯詔隋帝及其宗室柩在江都者爲營窆置陵  
廟以故宮人守之丙午慮囚封子元景爲趙王元昌魯王元亨鄴王己酉出宮女五

百人賜東征將士有功者甲寅顯州長史田瓚殺行臺尙書令楊士林叛附於王世充乙卯瘞州縣暴骨七月壬戌秦王世民討王世充甲戌皇太子屯於蒲州以備突厥丙戌梁師都導突厥稽胡寇邊行軍總管段德操敗之八月庚子慮囚甲辰時德劄降九月癸酉田瓚降己丑給復陝鼎熊穀四州二年十月戊申高開道降己酉楊仲達降己未有星隕於東都十二月己酉瓜州刺史賀拔行威反

四年正月辛巳皇太子伐稽胡二月竇建德陷曹州執孟海公己丑車騎將軍董阿興反於隴州伏誅乙巳太常少卿李仲文謀反伏誅丙午慮囚丁巳赦代州總管府石嶺之北三月進封宜都郡王泰爲衛王庚申慮囚乙酉竇建德陷管州刺史郭志安死之四月壬寅齊王元吉及王世充戰於東都敗績行軍總管盧君諤死之戊申突厥寇并州執漢陽郡王瓌太常卿鄭元疇左驍騎衛大將軍長孫順德甲寅封子元方爲周王元禮鄭王元嘉宋王元則荆王元茂越王丁巳左武衛將軍王君廓敗張青特執之五月壬戌秦王世民敗竇建德於虎牢執之乙丑赦山東爲建德所誣誤者戊辰王世充降庚午周法明降六月庚寅赦河南爲王世充所誣誤者戊戌蔣

善合降庚子營州人石世則執其總管晉文衍叛附於靺鞨乙卯臧君相降七月甲子秦王世民俘王世充以獻丙寅竇建德伏誅丁卯大赦給復天下一年陝鼎函虢虞芮幽七州二年甲戌劉黑闥反於貝州辛巳戴州刺史孟噉鬼反伏誅八月丙戌朔日有食之丁亥皇太子安撫北境丁酉劉黑闥陷鄆縣魏州刺史權威貝州刺史戴元祥死之癸卯突厥寇代州執行軍總管王孝基丁未劉黑闥陷歷亭屯衛將軍王行敏死之辛亥深州人崔元遜殺其刺史裴晞叛附於劉黑闥兗州總管徐圓朗反九月盧祖尙降乙卯淳于難降甲子汪華降是秋夔州總管趙郡王孝恭率十二總管兵以討蕭銑十月己丑秦王世民爲天策上將領司徒齊王元吉爲司空庚寅劉黑闥陷瀛州執刺史盧士叟又陷觀州癸卯毛州人董燈明殺其刺史趙元愷乙巳趙郡王孝恭敗蕭銑於荊州執之閏月乙卯如稷州己未幸舊墅壬戌獵於好畤乙丑獵於九變丁卯獵於仲山戊辰獵於清水谷遂幸三原辛未如周氏陂壬申至自周氏陂十一月甲申有事於南郊庚寅李子通降丙申子通謀反伏誅壬寅劉黑闥陷定州總管李玄通死之庚戌杞州人周文舉殺其刺史王孝矩叛附於黑闥十

二月乙卯黑闥陷冀州總管麴稜死之甲子左武候將軍李世勣及黑闥戰於宋州敗績丁卯秦王世民齊王元吉討黑闥己巳黑闥陷邢州庚午陷魏州總管潘道毅死之辛未陷業州壬申徙封元嘉爲徐王

五年正月乙酉劉黑闥陷相州刺史房晃死之丙戌殷恭遂降丁亥濟州別駕劉伯通執其刺史竇務本叛附於徐圓朗庚寅東鹽州治中王才藝殺其刺史田華叛附於劉黑闥丙申相州人殺其刺史獨孤徹以其州叛附於黑闥己酉楊世略劉元進降二月王要漢降己巳秦王世民克邢州丁丑劉黑闥陷洛水總管羅士信死之戊寅汴州總管王要漢敗徐圓朗於杞州執周文舉三月戊戌譚州刺史李義滿殺齊州都督王薄丁未秦王世民及劉黑闥戰於洛水敗之黑闥亡入於突厥蔚州總管高開道反寇易州刺史慕容孝幹死之四月梁州野蠶成繭冉安昌降己未寧長眞降戊辰釋流罪以下穫麥壬申代州總管李大恩及突厥戰死之戊寅鄧文進降五月田留安降庚寅瓜州人王幹殺賀拔行威以降乙巳賜荊州令歲田租六月辛亥劉黑闥與突厥寇山東車騎將軍元韶爲瓜州道行軍總管以備突厥癸丑吐谷渾



寇洮旭疊三州岷州總管李長卿敗之乙卯淮安郡王神通討徐圓朗七月甲申作  
弘義宮甲午淮陽郡王道玄爲河北道行軍總管討劉黑闥貝州人董該以定州叛  
附於黑闥丙申突厥殺劉武周於白道遷州人鄧士政反執其刺史李敬昂丁酉馮  
盎降八月辛亥葬隋煬帝甲寅吐谷渾寇岷州益州道行臺左僕射竇軌敗之乙卯  
突厥寇邊庚申皇太子出幽州道秦王世民出秦州道以禦突厥己巳吐谷渾陷洮  
州并州總管襄邑郡王神符及突厥戰於汾東敗之戊寅突厥陷大震關九月癸巳  
靈州總管楊師道敗之於三觀山丙申洪州總管宇文歆又敗之於崇岡壬寅定州  
總管雙士洛驃騎將軍魏道仁又敗之於恆山之陽丙午領軍將軍安興貴又敗之  
於甘州劉黑闥陷瀛州刺史馬匡武死之東鹽州人馬君德以其州叛附於黑闥十  
月己酉齊王元吉討黑闥癸丑貝州刺史許善護及黑闥戰於鄆縣死之甲寅觀州  
刺史劉君會叛附於黑闥乙丑淮陽郡王道玄及黑闥戰於下博死之己巳林士弘  
降十一月庚辰劉黑闥陷滄州甲申皇太子討黑闥丙申如宜州癸卯獵於富平北  
原十二月丙辰獵於萬壽原戊午劉黑闥陷恆州刺史王公政死之庚申至自萬壽

原壬申皇太子及劉黑闥戰於魏州敗之甲戌又敗之於毛州

六年正月己卯黑闥將葛德威執黑闥以降壬午壽州人王摩娑反驃騎將軍衛彥討之庚寅徐圓朗陷泗州二月劉黑闥伏誅庚戌幸溫湯壬子獵於驪山甲寅至自溫湯丙寅行軍總管李世勣敗徐圓朗執之三月苗海潮梅知巖左難當降乙巳洪州總管張善安反四月己酉吐蕃陷芳州己未以故第爲通義宮祭元皇帝元貞皇后於舊寢赦京城賜從官帛辛酉張善安陷孫州執總管王戎丁卯南州刺史龐孝泰反陷南越州壬申封子元璿爲蜀王元慶漢王癸酉裴寂爲尙書左僕射蕭瑀爲右僕射封德彝爲中書令吏部尙書楊恭仁兼中書令檢校涼州諸軍事五月庚寅吐谷渾党項寇河州刺史盧士良敗之癸卯高開道以奚寇幽州長史王說敗之六月丁卯突厥寇朔州總管高滿政敗之曲赦朔州七月丙子沙州別駕竇伏明反殺其總管賀若懷廓己亥皇太子屯於北邊秦王世民屯於并州以備突厥八月壬子淮南道行臺左僕射輔公祐反乙丑趙郡王孝恭討之九月壬辰秦王世民爲江州道行軍元帥丙申渝州人張大智反十月丙午殺廣州都督劉世讓戊申降死罪流

以下原之己未如華陰張大智降庚申獵於白鹿原壬戌右虞候率杜士遠殺高滿政以朔州反丁卯突厥請和十一月壬午張善安襲殺黃州總管周法明丁亥如華陰辛卯獵於沙苑丁酉獵於伏龍原十二月壬寅朔日有食之癸卯張善安降庚戌以奉義監爲龍躍宮武功宅爲慶善宮甲寅至自華陰

七年正月庚寅鄒州人鄧同穎殺其刺史李士衡二月丁巳釋奠於國學己未漁陽部將張金樹殺高開道以降三月戊戌趙郡王孝恭敗輔公祐執之己亥孝恭殺越州都督闕稜四月庚子大赦班新律令給復江州道二年揚越一年五月丙戌作仁智宮六月辛丑如仁智宮壬戌慶州都督楊文幹反七月己巳突厥寇朔州總管秦武通敗之癸酉慶州人殺楊文幹以降甲午至自仁智宮雋州地震山崩遏江水閏月己未秦王世民齊王元吉屯於豳州以備突厥八月己巳吐谷渾寇鄯州驃騎將軍彭武傑死之戊寅突厥寇綏州刺史劉大俱敗之壬辰突厥請和丁酉裴寂使於突厥十月丁卯如慶善宮辛未獵於鄠南癸酉幸終南山丙子謁樓觀老子祠庚寅獵於圍川十二月丁卯如龍躍宮戊辰獵於高陵庚午至自高陵太子詹事裴矩檢

校侍中

八年二月癸未慮囚四月甲申如鄠獵於甘谷作太和宮丙戌至自鄠六月甲子如太和宮七月丙午至自太和宮丁巳秦王世民屯於蒲州以備突厥八月壬申并州行軍總管張瑾及突厥戰於太谷敗績鄆州都督張德政死之執行軍長史溫彥博甲申任城郡王道宗及突厥戰於靈州敗之丁亥突厥請和十月辛巳如周氏陂獵於北原壬午如龍躍宮十一月辛卯如宜州獵於西原裴矩罷庚子講武於同官天策府司馬宇文士及權檢校侍中辛丑徙封元璿爲吳王元慶陳王癸卯秦王世民爲中書令齊王元吉爲侍中癸丑獵於華池北原十二月辛酉至自華池庚辰獵於鳴犢泉辛巳至自鳴犢泉

九年正月甲寅裴寂爲司空二月庚申齊王元吉爲司徒壬午有星孛於胃昴丁亥孛於卷舌三月庚寅幸昆明池習水戰壬辰至自昆明池丙午如周氏陂乙卯至自周氏陂丁巳突厥寇涼州都督長樂郡王幼良敗之四月辛巳廢浮屠老子法六月丁巳太白經天庚申秦王世民殺皇太子建成齊王元吉大赦復浮屠老子法癸亥

立秦王世民爲皇太子聽政賜爲父後者襲勳爵赤牒官得爲眞免民逋租宿賦己卯太白晝見庚辰幽州都督廬江郡王瑗反伏誅癸未赦幽州管內爲瑗所誣誤者七月辛卯楊恭仁罷太子右庶子高士廉爲侍中左庶子房玄齡爲中書令蕭瑀爲尙書左僕射癸巳宇文士及爲中書令封德彝爲尙書左僕射辛亥太白晝見甲寅太白晝見八月丙辰突厥請和丁巳太白晝見壬戌吐谷渾請和甲子皇太子卽皇帝位貞觀三年太上皇徙居大安宮九年五月崩於垂拱前殿年七十一諡曰大武廟號高祖上元元年改諡神堯皇帝天寶八載諡神堯大聖皇帝十三載增諡神堯大聖大光孝皇帝

太宗 新唐書

太宗文武大聖大廣孝皇帝諱世民高祖次子也母曰太穆皇后竇氏生而不驚方四歲有書生謁高祖曰公在相法貴人也然必有貴子及見太宗曰龍鳳之姿天日之表其年幾冠必能濟世安民書生已辭去高祖懼其語泄使人追殺之而不知其所往固以爲神乃採其語名之曰世民大業中突厥圍煬帝鴈門煬帝從圍中以木

繫詔書投汾水而下募兵赴援太宗時年十六往應募隸將軍雲定興謂定興曰虜  
敢圍吾天子者以爲無援故也今宜先後吾軍爲數十里使其晝見旌旗夜聞鉦鼓  
以爲大至則可不擊而走之不然知我虛實則勝敗未可知也定興從之軍至崞縣  
突厥候騎見其軍來不絕果馳告始畢可汗曰救兵大至矣遂引去高祖擊歷山飛  
陷其圍中太宗馳輕騎取之而出遂奮擊大破之太宗爲人聰明英武有大志而能  
屈節下士時天下已亂盜賊起知隋必亡乃推財養士結納豪傑長孫順德劉弘基  
等皆因事亡命匿之又與晉陽令劉文靜尤善文靜坐李密事繫獄太宗夜就獄中  
見之與圖大事時百姓避賊多入城城中幾萬人文靜爲令久知其豪傑因共部署  
計已定乃因裴寂告高祖高祖初不許已而許之高祖已起兵建大將軍府太宗率  
兵徇西河斬其郡丞高德儒拜右領軍大都督封燉煌郡公唐兵西將至霍邑會天  
久雨糧且盡高祖謀欲還兵太原太宗諫曰義師爲天下起也宜直入咸陽號令天  
下今還守一城是爲賊爾高祖不納太宗哭於軍門高祖驚召問之對曰還則衆散  
於前而敵乘於後死亡須臾所以悲爾高祖寤曰起事者汝也成敗惟汝時左軍已

先返卽與隴西公建成分追之夜半太宗失道入山谷棄其馬步而及其兵與俱還高祖乃將而前遲明至霍邑宋老生不出太宗從數騎傅其城舉鞭指麾若將圍之者老生怒出背城陣高祖率建成居其東太宗及柴紹居其南老生兵薄東陣建成墜馬老生乘之高祖軍却太宗自南原馳下坂分兵斷其軍爲二而出其陣後老生兵敗走遂斬之進次涇陽擊胡賊劉鷁子破之唐兵攻長安太宗屯金城坊攻其西北遂克之義寧元年爲光祿大夫唐國內史徙封秦國公食邑萬戶薛舉攻扶風太宗擊敗之斬首萬餘級遂略地至隴右二年爲右元帥徙封趙國公率兵十萬攻東都不克而還設三伏於三王陵敗隋將段達兵萬人武德元年爲尙書令右翊衛大將軍進封秦王薛舉寇涇州太宗爲西討元帥進位雍州牧七月太宗有疾諸將爲舉所敗八月太宗疾間復屯於高墪城相持六十餘日已而舉死其子仁杲率其衆求戰太宗按軍不動久之仁杲糧盡衆稍離叛太宗曰可矣乃遣行軍總管梁實柵淺水原仁杲將宗羅曠擊實太宗遣將軍龐玉救實玉軍幾敗太宗率兵出其後羅曠敗走太宗追之至其城下仁杲乃出降師還高祖遣李密馳傳勞之於豳州密見

太宗不敢仰視退而歎曰眞英主也獻捷太廟拜右武侯大將軍太尉使持節陝東道大行臺尙書令詔蒲陝河北諸總管兵皆受其節度二年正月鎮長春宮進拜左武侯大將軍涼州總管是時劉武周據并州宋金剛陷滄州王行本據蒲州而夏縣人呂崇茂殺縣令以應武周高祖懼詔諸將棄河東以守關中太宗以爲不可棄願得兵三萬可以破賊高祖於是悉發關中兵益之十一月出龍門關屯於柏壁三年四月擊敗宋金剛於柏壁金剛走介州太宗追之一日夜馳二百里宿於雀鼠谷之西原軍士皆饑太宗不食者二日行至涪州乃得食而金剛將尉遲敬德尋相等皆來降劉武周懼奔於突厥其將楊伏念舉并州降高祖遣蕭瑀卽軍中拜太宗益州道行臺尙書令七月討王世充敗之於北邨四年二月竇建德率兵十萬以援世充太宗敗建德於虎牢執之世充乃降六月凱旋太宗被金甲陳鐵騎一萬介士三萬前後鼓吹獻俘於太廟高祖以謂太宗功高古官號不足以稱乃加號天策上將領司徒陝東道大行臺尙書令位在王公上增邑戶至三萬賜袞冕金輅雙壁黃金六千斤前後鼓吹九部之樂班劍四十人五年正月討劉黑闥於洛州敗之黑闥旣降



已而復反高祖怒命太子建成取山東男子十五以上悉阬之毆其小弱婦女以實關中太宗切諫以爲不可遂已加拜左右十二衛大將軍七年突厥寇邊太宗與遇於幽州從百騎與其可汗語乃盟而去八年進位中書令初高祖起太原非其本意而事出太宗及取天下破宋金剛王世充竇建德等太宗功益高而高祖屢許以爲太子太子建成懼廢與齊王元吉謀害太宗未發九年六月太宗以兵入玄武門殺太子建成及齊王元吉高祖大驚乃以太宗爲皇太子八月甲子卽皇帝位於東宮顯德殿遣裴寂告於南郊大赦武德流人還之賜文武官勳爵免關內及蒲芮虞秦陝鼎六州二歲租給復天下一年民八十以上賜粟帛百歲加版授廢潼關以東瀕河諸關癸酉放宮女三千餘人丙子立妃長孫氏爲皇后癸未突厥寇便橋乙酉及突厥頡利盟於便橋九月壬子禁私家妖神淫祀占卜非龜易五兆者十月丙辰朔日有食之癸亥立中山郡王承乾爲皇太子庚辰蕭瑀陳叔達罷十一月庚寅降宗室郡王非有功者爵爲縣公十二月癸酉慮囚是歲進封子長沙郡王恪爲漢王宜

陽郡王祐楚王

貞觀元年正月乙酉改元辛丑燕郡王李藝反於涇州伏誅二月丁巳詔民男二十女十五以上無夫家者州縣以禮聘娶貧不能自行者鄉里富人及親戚資送之鰥夫六十寡婦五十婦人有子若守節者勿彊三月癸巳皇后親蠶丙午詔齊僕射崔季舒黃門侍郎郭遵尙書右丞封孝琰以極言蒙難季舒子剛遵子雲孝琰子君遵並及淫刑宜免內侍褻敘以官閏月癸丑朔日有食之四月癸巳涼州都督長樂郡王幼良有罪伏誅五月癸丑勅中書令侍中朝堂受訟辭有陳事者悉上封六月辛丑封德彝薨甲辰太子少師蕭瑀爲尙書左僕射是夏山東旱免今歲租七月壬子吏部尙書長孫無忌爲尙書右僕射八月河南隴右邊州霜宇文士及檢校涼州都督戊戌貶高士廉爲安州大都督九月庚戌朔日有食之辛酉遣使諸州行損田賑問下戶御史大夫杜淹檢校吏部尙書參議朝政宇文士及罷辛未幽州都督王君廓奔於突厥十月丁酉以歲饑減膳十一月己未許子弟年十九以下隨父兄之官所十二月壬午蕭瑀罷戊申利州都督李孝常右武衛將軍劉德裕謀反伏誅

二年正月辛亥長孫無忌罷兵部尙書杜如晦檢校侍中總監東宮兵馬事癸丑吐

谷渾寇岷州都督李道彥敗之丁巳徙封恪爲蜀王泰越王祐燕王庚午刑部尙書  
李靖檢校中書令二月戊戌外官上考者給祿三月戊申朔日有食之壬子命中書  
門下五品以上及尙書議決死罪壬戌李靖爲關內道行軍大總管以備薛延陀己  
巳遣使巡關內出金寶贖饑民鬻子者還之庚午以旱蝗責躬大赦癸酉兩四月己  
卯瘞隋人暴骸壬寅朔方人梁洛仁殺梁師都以降六月甲申詔出使官稟食其家  
庚寅以子治生賜是日生子者粟辛卯辰州刺史裴虔通以弑隋煬帝削爵流驩州  
七月戊申萊州刺史牛方裕絳州刺史薛世良廣州長史唐奉義虎牙郎將高元禮  
以宇文化及之黨皆除名徙於邊八月甲戌省寃獄於朝堂辛丑立二王後廟置國  
官九月壬子以有年賜酺三日十月庚辰杜淹薨戊子殺瀛州刺史盧祖尙十一月  
辛酉有事於南郊十二月壬辰黃門侍郎王珪守侍中癸巳禁五品以上過市  
三年正月丙午以旱避正殿癸丑官得上下考者給祿一年戊午享於太廟癸亥耕  
籍田辛未裴寂罷二月戊寅房玄齡爲尙書左僕射杜如晦爲右僕射尙書右丞魏  
徵爲秘書監參預朝政三月己酉慮囚四月乙亥太上皇徙居於大安宮甲午始御

太極殿戊戌賜孝義之家粟五斛八十以上二斛九十以上三斛百歲加絹二匹婦人正月以來產子者粟一斗五月乙丑周王元方薨六月戊寅以旱慮囚己卯大風拔木壬午詔文武官言事八月己巳朔日有食之丁亥李靖爲定襄道行軍大總管以伐突厥九月丁巳華州刺史柴紹爲勝州道行軍總管以伐突厥十一月庚申并州都督李世勣爲通漠道行軍總管華州刺史柴紹爲金河道行軍總管任城郡王道宗爲大同道行軍總管幽州都督衛孝節爲恆安道行軍總管營州都督薛萬淑爲暢武道行軍總管以伐突厥十二月癸未杜如晦罷閏月癸丑爲死兵者立浮屠祠辛酉慮囚是歲中國人歸自塞外及開四夷爲州縣者百二十餘萬人

四年正月丁卯朔日有食之癸巳武德殿北院火二月己亥幸溫湯甲辰李靖及突厥戰於陰山敗之丙午至自溫湯甲寅大赦賜酺五日御史大夫溫彥博爲中書令王珪爲侍中民部尙書戴胄檢校吏部尙書參豫朝政太常卿蕭瑀爲御史大夫與宰臣參議朝政丁巳以旱詔公卿言事三月甲午李靖俘突厥頡利可汗以獻四月戊戌西北君長請上號爲天可汗六月乙卯發卒治洛陽宮七月甲子朔日有食之

癸酉蕭瑀罷甲戌太上皇不豫廢朝辛卯疾愈賜都督刺史文武官及民年八十以上孝子表門閭者有差八月甲寅李靖爲尙書右僕射九月庚午瘞長城南隋人暴骨己卯如隴州壬午禁芻牧於古明君賢臣烈士之墓者十月壬辰赦岐隴二州免今歲租賦降咸陽始平武功死罪以下辛卯獵於貴泉谷甲辰獵於魚龍川獻獲於大安宮乙卯免武功今歲租賦十一月壬戌右衛大將軍侯君集爲兵部尙書參議朝政甲子至自隴州戊寅除鞭背刑十二月甲辰獵於鹿苑乙巳至自鹿苑是歲天下斷死罪者二十九人

五年正月癸酉獵於昆明池丙子至自昆明池獻獲於大安宮二月己酉封弟元裕爲鄆王元名譙王靈夔魏王元祥許王元曉密王庚戌封子愔爲梁王貞漢王惲郟王治晉王慎申王囂江王簡代王四月壬辰代王簡薨五月乙丑以金帛購隋人沒於突厥者以還其家八月甲辰遣使高麗祭隋人戰亡者戊申殺大理丞張蘊古十一月丙子有事於南郊十二月丁亥詔決死刑京師五覆奏諸州三覆奏其日尙食毋進酒肉壬寅幸溫湯癸卯獵於驪山賜新豐高年帛戊申至自溫湯癸丑赦關內

六年正月乙卯朔日有食之癸酉靜州山獠反右武衛將軍李子和敗之三月侯君集罷戊辰如九成宮丁丑降雍岐豳三州死罪以下賜民八十以上粟帛五月魏徵檢校侍中六月己亥鄴王元亨薨辛亥江王囂薨七月己巳詔天下行鄉飲酒九月己酉幸慶善宮十月侯君集起復乙卯至自慶善宮十二月辛未慮囚縱死罪者歸其家是歲諸羌內屬者三十萬人

七年正月戊子斥宇文化及黨人之子孫勿齒辛丑賜京城酺三日二月丁卯雨土三月戊子王珪罷庚寅魏徵爲侍中五月癸未如九成宮六月辛亥戴胄薨八月辛未東西洞獠寇邊右屯衛大將軍張士貴爲龔州道行軍總管以討之九月縱囚來歸皆赦之十月庚申至自九成宮乙丑京師地震十一月壬辰開府儀同三司長孫無忌爲司空十二月甲寅幸芙蓉園丙辰獵於少陵原戊午至自少陵原

八年正月辛丑張士貴及獠戰敗之壬寅遣使循省天下二月乙巳皇太子加元服丙午降死罪以下賜五品以上子爲父後者爵一級民酺三日三月庚辰如九成宮五月辛未朔日有食之是夏吐谷渾寇涼州左驍衛大將軍段志玄爲西海道行軍

總管左驍衛將軍樊興爲赤水道行軍總管以伐之七月隴右山崩八月甲子有星  
孛於虛危十月作永安宮甲子至自九成宮十一月辛未李靖罷己丑吐谷渾寇涼  
州執行人鴻臚丞趙德楷十二月辛丑特進李靖爲西海道行軍大總管侯君集爲  
積石道行軍總管任城郡王道宗爲鄯善道行軍總管膠東郡公道彥爲赤水道行  
軍總管涼州都督李大亮爲且末道行軍總管利州刺史高甌生爲鹽澤道行軍總  
管以伐吐谷渾丁卯從太上皇閱武於城西

九年正月党項羌叛二月長孫無忌罷三月庚辰洮州羌殺刺史孔長秀附於吐谷  
渾壬午大赦乙酉高甌生及羌人戰敗之閏四月丙寅朔日有食之五月長孫無忌  
起復庚子太上皇崩皇太子聽政壬子李靖及吐谷渾戰敗之七月庚子鹽澤道行  
軍副總管劉德敏及羌人戰敗之十月庚寅葬太武皇帝於獻陵十一月壬戌特進  
蕭瑀參豫朝政

十年正月甲午復聽政癸丑徙封元景爲荆王元昌漢王元禮徐王元嘉韓王元則  
彭王元懿鄭王元軌霍王元鳳虢王元慶道王靈夔燕王恪吳王泰魏王祐齊王愔

蜀王暉蔣王貞越王慎紀王三月癸丑出諸王爲都督六月壬申溫彥博爲尙書右僕射太常卿楊師道爲侍中魏徵罷爲特進知門下省事參議朝章國典己卯皇后崩十一月庚寅葬文德皇后於昭陵十二月蕭瑀罷庚辰慮囚

十一年正月丁亥徙封元裕爲鄧王元名舒王庚子作飛仙宮乙卯免雍州今歲租賦二月丁巳營九峻山爲陵賜功臣密戚陪塋地及祕器甲子如洛陽宮乙丑給民百歲以上侍五人壬午獵於鹿臺嶺三月丙戌朔日有食之癸卯降洛州囚見徒免一歲租調辛亥獵於廣成澤癸丑如洛陽宮六月甲寅溫彥博薨丁巳幸明德宮己未以諸王爲世封刺史戊辰以功臣爲世封刺史己巳徙封元祥爲江王七月癸未大雨水穀洛溢乙未詔百官言事壬寅廢明德宮之玄圃院賜遭水家丙午給亳州老子廟兗州孔子廟戶各二十以奉享復涼武昭王近墓戶二十以守衛九月丁亥河溢壞陝州河北縣毀河陽中潭幸白司馬坂觀之賜瀕河遭水家粟帛十月癸丑賜先朝謀臣武將及親戚亡者塋陪獻陵十一月辛卯如懷州乙未獵於濟源麥山丙午如洛陽宮



十二年正月乙未叢州地震癸卯松州地震二月癸亥如河北縣觀底柱甲子巫州  
獠反夔州都督齊善行敗之乙丑如陝州丁卯觀鹽池庚午如蒲州甲戌如長春宮  
免朝邑今歲租賦降囚罪乙亥獵於河濱閏月庚辰朔日有食之丙戌至自長春宮  
七月癸酉吏部尙書高士廉爲尙書右僕射八月壬寅吐蕃寇松州侯君集爲當彌  
道行軍大總管率三總管兵以伐之九月辛亥關水道行軍總管牛進達及吐蕃戰  
於松州敗之十月己卯獵於始平賜高年粟帛乙未至自始平鈞州山獠反桂州都  
督張寶德敗之十一月己巳明州山獠反交州都督李道彥敗之十二月辛巳壁州  
山獠反右武侯將軍上官懷仁討之是歲滁豪二州野蠶成繭

十三年正月乙巳拜獻陵赦三原及行從免縣人今歲租賦賜宿衛陵邑郎將三原  
令爵一級丁未至自獻陵二月庚子停世封刺史三月乙丑有星孛於畢昴四月戊  
寅如九成宮甲申中郎將阿史那結社率反伏誅壬寅雲陽石然五月甲寅以旱避  
正殿詔五品以上言事減膳罷役理囚賑乏乃雨六月丙申封弟元嬰爲滕王八月  
辛未朔日有食之十月甲申至自九成宮十一月辛亥楊師道爲中書令戊辰尙書

左丞劉洎爲黃門侍郎參知政事十二月壬申侯君集爲交河道行軍大總管以伐高昌乙亥封子福爲趙王壬辰獵於咸陽癸巳至自咸陽是歲滁州野蠶成繭

十四年正月庚子有司讀時令甲寅幸魏王泰第赦雍州長安縣免延康里今歲租賦二月丁丑觀釋奠於國學赦大理萬年縣賜學官高第生帛壬午幸溫湯辛卯至自溫湯乙未求梁皇偏褚仲都周熊安生沈重陳沈文阿周弘正張譏隋何妥劉焯劉炫之後三月羅竇二州獠反廣州總管党仁弘敗之五月壬寅徙封靈夔爲魯王六月滁州野蠶成繭乙酉大風拔木八月庚午作襄城宮癸酉侯君集克高昌九月癸卯赦高昌部及士卒父子犯死葦犯流大功犯徒小功總麻犯杖皆原之閏十月乙未如同州甲辰獵於堯山庚戌至自同州十一月甲子有事於南郊十二月丁酉侯君集俘高昌王以獻賜酺三日癸卯獵於樊川乙巳至自樊川

十五年正月辛巳如洛陽宮次溫湯衛士崔卿刁文懿謀反伏誅三月戊辰如襄城宮四月辛卯詔以來歲二月有事於泰山乙未免洛州今歲租還戶故給復者加給一年賜民八十以上物惇獨鰥寡疾病不能自存者米二斛慮囚六月己酉有星孛

於太微丙辰停封泰山避正殿減膳七月丙寅宥周隋名臣及忠烈子孫貞觀以後  
流配者十月辛卯獵於伊闕壬辰如洛陽宮十一月癸酉薛延陀寇邊兵部尙書李  
世勣爲朔州道行軍總管右衛大將軍李大亮爲靈州道行軍總管涼州都督李襲  
譽爲涼州道行軍總管以伐之十二月戊子至自洛陽宮庚子命三品以上嫡子事  
東宮辛丑慮囚甲辰李世勣及薛延陀戰於諾真水敗之乙巳贈戰亡將士官三轉  
十六年正月乙丑遣使安撫西州戊辰募戍西州者前犯流死亡匿聽自首以應募  
辛未徙天下死罪囚實西州中書舍人岑文本爲中書侍郎專典機密六月戊戌太  
白晝見七月戊午長孫無忌爲司徒房玄齡爲司空十一月丙辰獵於武功壬戌獵  
於岐山之陽甲子賜所過六縣高年孤疾氈衾粟帛遂幸慶善宮庚午至自慶善宮  
十二月癸卯幸温湯甲辰獵於驪山乙巳至自温湯

十七年正月戊辰魏徵薨代州都督劉蘭謀反伏誅二月己亥慮囚戊申圖功臣於  
凌煙閣三月壬子禁送終違令式者丙辰齊王祐反李世勣討之甲子以旱遣使覆  
囚決獄乙丑齊王祐伏誅給復齊州一年四月乙酉廢皇太子爲庶人漢王元昌侯

君集等伏誅丙戌立晉王治爲皇太子大赦賜文武官及五品以上子爲父後者爵一級民八十以上粟帛酺三日丁亥楊師道罷己丑特進蕭瑀爲太子太保李世勣爲太子詹事同中書門下三品庚寅謝承乾之過於太廟癸巳降封魏王泰爲東萊郡王六月己卯朔日有食之壬辰葬隋恭帝甲午以旱避正殿減膳詔京官五品以上言事丁酉高士廉同中書門下三品平章政事閏月丁巳詔皇太子典左右屯營兵丙子徙封泰爲順陽郡王七月丁酉房玄齡罷八月庚戌工部尙書張亮爲刑部尙書參豫朝政十月丁未建諸州邸於京城丁巳房玄齡起復十一月己卯有事於南郊壬午賜酺三日以涼州獲瑞石赦涼州十二月庚申幸溫湯庚午至自溫湯十八年正月乙未如鍾官城庚子如鄠壬寅幸溫湯二月己酉如零口乙卯至自零口丁巳給復突厥高昌部人隸諸州者二年四月辛亥如九成宮七月甲午營州都督張儉率幽營兵及契丹奚以伐高麗八月壬子安西都護郭孝恪無西州道行軍總管以伐焉耆甲子至自九成宮丁卯劉洎爲侍中岑文本爲中書令中書侍郎馬周守中書令九月黃門侍郎褚遂良參豫朝政辛卯郭孝恪及焉耆戰敗之十月辛

丑朔日有食之癸卯宴雍州父老於上林苑賜粟帛甲寅如洛陽宮己巳獵於天池十一月戊寅慮囚庚辰遣使巡問鄭汝懷澤四州高年宴賜之甲午張亮爲平壤道行軍大總管李世勣馬周爲遼東道行軍大總管率十六總管兵以伐高麗十二月壬寅庶人承乾卒戊午李思摩部落叛

十九年二月庚戌如洛陽宮以伐高麗癸丑射虎於武德北山乙卯皇太子監國於定州丁巳賜所過高年鰥寡粟帛贈比干太師諡忠烈三月壬辰長孫無忌攝侍中吏部尙書楊師道攝中書令四月癸卯誓師於幽州大饗軍丁未岑文本薨癸亥李世勣克蓋牟城五月己巳平壤道行軍總管程名振克沙卑城庚午次遼澤瘞隋人戰亡者乙亥遼東道行軍總管張君乂有罪伏誅丁丑軍至馬首山甲申克遼東城六月丁酉克白巖城己未大敗高麗於安市城東南山左武衛將軍王君愕死之辛酉賜酺三日七月壬申葬死事官加爵四級以一子襲九月癸未班師十月丙午次營州以太牢祭死事者丙辰皇太子迎謁於臨渝關戊午次漢武臺刻石紀功十一月癸酉大饗軍於幽州庚辰次易州癸未平壤道行軍總管張文幹有罪伏誅丙戌

次定州丁亥貶楊師道爲工部尙書十二月戊申次并州己未薛延陀寇夏州左領軍大將軍執失思力敗之庚申殺劉洎

二十年正月辛未夏州都督喬師望及薛延陀戰敗之丁丑遣使二十二人以六條黜陟於天下庚辰赦并州起義時編戶給復三年後附者一年二月甲午從伐高麗無功者皆賜勳一轉庚申賜所過高年鰥寡粟三月己巳至自高麗庚午不豫皇太子聽政己丑張亮謀反伏誅閏月癸巳朔日有食之六月乙亥江夏郡王道宗李世勣伐薛延陀七月辛亥疾愈李世勣及薛延陀戰敗之八月甲子封孫忠爲陳王己巳如靈州庚辰次涇州賜高年鰥寡粟帛丙戌踰隴山關次瓦亭觀牧馬丁亥許陪陵者子孫從葬九月辛卯遣使巡察嶺南甲辰鐵勒諸部請上號爲可汗辛亥靈州地震十月貶蕭瑀爲商州刺史丙戌至自靈州十一月己丑詔祭祀表疏藩客兵馬宿衛行魚契給驛授五品以上官及除解決死罪皆以聞餘委皇太子

二十一年正月壬辰高士廉薨丁酉詔以來歲二月有事於泰山甲寅以鐵勒諸部爲州縣賜京師醮三日慮囚降死罪以下二月丁丑皇太子釋菜於太學三月戊子

左武衛大將軍牛進達爲青丘道行軍大總管李世勤爲遼東道行軍大總管率三總管兵以伐高麗四月乙丑作翠微宮五月戊子幸翠微宮壬辰命百司決事於皇太子庚戌李世勤克南蘇木底城六月丁丑遣使鐵勒諸部購中國人陷沒者七月乙未牛進達克石城丙申作玉華宮庚戌至自翠微宮八月泉州海溢壬戌停封泰山九月丁酉封子明爲曹王十月癸丑褚遂良罷十一月癸卯進封泰爲濮王十二月戊寅左驍衛大將軍契苾何力爲崑丘道行軍大總管率三總管兵以伐龜茲

二十二年正月庚寅馬周薨戊戌幸溫湯己亥中書舍人崔仁師爲中書侍郎參知機務丙午左武衛大將軍薛萬徹爲青丘道行軍大總管以伐高麗長孫無忌檢校中書令知尙書門下省事戊申至自溫湯二月褚遂良起復乙卯見京城父老勞之蠲今歲半租畿縣三之一丁卯詔度遼水有功未酬勳而犯罪者與成官同乙亥幸玉華宮己卯獵於華原流崔仁師於連州三月丁亥赦宜君給復縣人自玉華宮苑中遷者三年四月丁巳松州蠻叛右武侯將軍梁建方敗之六月丙寅張行成存問河北從軍者家令州縣爲營農丙子薛萬徹及高麗戰於泊灼城敗之七月甲申太

白晝見壬辰殺華州刺史李君羨癸卯房玄齡薨八月己酉朔日有食之辛未執失思力伐薛延陀餘部於金山九月庚辰崑丘道行軍總管阿史那社尒及薛延陀餘部處月處密戰敗之己亥褚遂良爲中書令壬寅眉邛雅三州獠反茂州都督張士貴討之十月癸丑至自玉華宮己巳阿史那社尒及龜茲戰敗之十二月辛未降長安萬年徒罪以下閏月癸巳慮囚

二十三年正月辛亥阿史那社尒俘龜茲王以獻三月己未自冬旱至是雨辛酉大赦丁卯不豫命皇太子聽政於金液門四月己亥幸翠微宮五月戊午貶李世勣爲疊州都督己巳皇帝崩于含風殿年五十三庚午奉大行御馬輿還京師禮部尙書于志寧爲侍中太子少詹事張行成兼侍中高季輔兼中書令壬申發喪諡曰文上元元年改諡文武聖皇帝天寶八載諡文武大聖皇帝十三載增諡文武大聖大廣孝皇帝





# 二十四史輯要

## 卷之四十一 唐

### 則天皇后 舊唐書

則天皇后武氏諱曩并州文水人也父士讓隋大業末爲鷹揚府隊正高祖行軍於汾晉每休止其家義旗初起從平京城貞觀中累遷工部尙書荊州都督封應國公初則天年十四時太宗聞其美容止召入宮立爲才人及太宗崩遂爲尼居感業寺大帝於寺見之復召入宮拜昭儀時皇后王氏良娣蕭氏嬪與武昭儀爭寵互讒毀之帝皆不納進號宸妃永徽六年廢王皇后而立武宸妃爲皇后高宗稱天皇武后亦稱天后后素多智計兼涉文史帝自顯慶已後多苦風疾百司表奏皆委天后詳決自此內輔國政數十年威勢與帝無異當時稱爲二聖弘道元年十二月丁巳大帝崩皇太子顯卽位尊天后爲皇太后既將篡奪是日自臨朝稱制庚午加授澤州刺史韓王元嘉爲太尉豫州刺史滕王元嬰爲開府儀同三司絳州刺史魯王靈夔爲太子太師相州刺史越王貞爲太子太傅安州都督紀王慎爲太子太保元嘉等

地尊望重恐其生變故進加虛位以安其心甲戌劉仁軌爲尙書左僕射岑長倩爲兵部尙書魏玄同爲黃門侍郎並依舊知政事劉齊賢爲侍中裴炎爲中書令

嗣聖元年春正月甲申朔改元二月戊午廢皇帝爲廬陵王幽于別所仍改賜名哲己未立豫王輪爲皇帝令居於別殿大赦天下改元文明皇太后仍臨朝稱制庚午

廢皇太孫重照爲庶人太常卿兼豫州府長史王德貞爲侍中中書侍郎豫王府司馬劉禕之同中書門下三品三月庶人賢死于巴州夏四月滕王元嬰薨改封畢王上金爲澤王葛王素節爲許王丁丑遷廬陵王哲於均州閏五月禮部尙書武承嗣

同中書門下三品秋七月突厥骨咄祿元珍寇朔州命左威衛大將軍程務挺拒之彗星見西北方長二丈餘經三十三日乃滅九月大赦天下改元爲光宅旗幟改從金色飾以紫畫以雜文改東都爲神都又改尙書省及諸司官名初置右肅政御史臺官員故司空李勣孫柳州司馬徐敬業僞稱揚州司馬殺長史陳敬之據揚州起兵自稱上將以匡復爲辭冬十月楚州司馬李崇福率所部三縣以應敬業命左玉鈐衛大將軍李孝逸爲大總管率兵三十萬以討之殺內史裴炎丁酉追削敬業父

祖官爵復其本姓徐氏十二月前中書令薛元超卒殺左威衛大將軍程務挺  
垂拱元年春正月以敬業平大赦天下改元劉仁軌薨三月遷廬陵王哲於房州頒  
下親撰垂拱格於天下夏四月內史鸞味道左授青州刺史五月秋官尙書裴居道  
爲內史納言王德眞配流象州冬官尙書蘇良嗣爲納言詔內文武九品已上及  
百姓咸令自舉是夏大旱

二年春正月皇太后下詔復政於皇帝以皇太后旣非實意乃固讓皇太后仍依舊  
臨朝稱制大赦天下初令都督刺史並準京官帶魚三月初置匭於朝堂有進書言  
事者聽投之由是人間善惡事多所知悉夏四月岑長倩爲內史六月蘇良嗣爲文  
昌左相天官尙書韋待價爲文昌右相並同鳳閣鸞臺二品右肅政御史大夫韋思  
謙爲納言

三年春正月封王子成義爲恒王隆基爲楚王隆範爲衛王隆業爲趙王二月韋思  
謙請致仕許之夏四月裴居道爲納言夏官侍郎張光輔爲鳳閣侍郎同鳳閣鸞臺  
平章事庚午劉禕之賜死於家秋八月地官尙書魏玄同檢校納言

四年春二月毀乾元殿就其地造明堂山東河南甚飢乏詔司屬卿王及善司府卿歐陽通冬官侍郎狄仁傑巡撫賑給夏四月魏王武承嗣僞造瑞石文云聖母臨人永昌帝業令雍州人唐同泰表稱獲之洛水皇太后大悅號其石爲寶圖擢授同泰游擊將軍五月皇太后加尊號曰聖母神皇秋七月大赦天下改寶圖曰天授聖圖封洛水神爲顯聖加位特進并立廟就水側置永昌縣天下大酺五日八月壬寅博州刺史琅邪王冲據博州起兵命左金吾大將軍丘神勣爲行軍總管討之庚戌冲父豫州刺史越王貞又舉兵於豫州與冲相應九月命內史岑長倩鳳閣侍郎張光輔左監門大將軍鞠崇裕率兵討之丙寅斬貞及冲等傳首神都改姓爲虺氏曲赦博州韓王元嘉魯王靈夔元嘉子黃國公譔靈夔子左散騎常侍范陽王藹霍王元軌及子江都王緒故虢王元鳳子東莞公融坐與貞通謀元嘉靈夔自殺元軌配流黔州譔等伏誅改姓虺氏自是宗室諸王相繼誅死者殆將盡矣其子孫年幼者咸配流嶺外誅其親黨數百餘家十二月神皇拜洛水受天授聖圖是日還宮明堂成永昌元年春正月神皇親享明堂大赦天下改元大酺七日三月張光輔爲內史武

承嗣爲納言夏四月誅蔣王憚道王元慶徐王元禮曹王明等諸子孫徙其家屬於  
嶺州五月命文昌右相韋待價爲安息道大總管以討吐蕃六月令文武官五品已  
上各舉所知秋七月紀王慎被誣告謀反載以檻車流于巴州改姓虺氏韋待價坐  
遲留不進士卒多飢饉而死配流繡州八月左肅政御史大夫王本立同鳳閣鸞臺  
三品辛巳誅內史張光輔九月納言魏玄同賜死于家冬十月春官尙書范履冰鳳  
閣侍郎邢文偉同鳳閣鸞臺平章事改羽林軍百騎爲千騎

載初元年春正月神皇親享明堂大赦天下依周制建子月爲正月改永昌元年十  
一月爲載初元年十二月爲臘月改舊正月爲一月大酺三日神皇自以翌字爲名  
遂改詔書爲制書春一月蘇良嗣爲特進武承嗣爲文昌左相岑長倩爲文昌右相  
裴居道爲太子少傅並依舊同鳳閣鸞臺三品鳳閣侍郎武攸寧爲納言邢文偉爲  
內史秋七月殺豫章王亶遷其父舒王元名於和州有沙門十人僞撰大雲經表上  
之盛言神皇受命之事制頒於天下令諸州各置大雲寺總度僧千人丁亥殺隨州  
刺史澤王上金舒州刺史許王素節并其子數十人九月九日壬午革唐命改國號

爲周改元爲天授大赦天下賜酺七日乙酉加尊號曰聖神皇帝降皇帝爲皇嗣丙戌初立武氏七廟於神都追尊神皇父贈太尉太原王士彞爲孝明皇帝兄子文昌左相承嗣爲魏王天官尙書三思爲梁王堂姪懿宗等十二人爲郡王司賓卿史務滋爲納言鳳閣侍郎宗秦客爲內史給事中傅游藝爲鸞臺侍郎仍依舊知鳳閣鸞臺平章事令史務滋等十人分道存撫天下改內外官所佩魚並作龜冬十月改并州文水縣爲武興縣依漢豐沛例百姓子孫相承給復

二年正月親祀明堂春三月改唐太廟爲享德廟夏四月令釋教在道法之上僧尼處道士女冠之前六月命岑長倩率諸軍討吐蕃左肅政御史大夫格輔元爲地官尙書鸞臺侍郎樂思晦並同鳳閣鸞臺平章事秋七月徙關內雍同等七州戶數十萬以實洛陽分京兆置鼎稷鴻宜四州夏官尙書歐陽通知納言事九月傅游藝下獄死右羽林衛大將軍建昌王攸寧爲納言洛州司馬狄仁傑爲地官侍郎同鳳閣鸞臺平章事冬十月制官人者咸令自舉殺文昌左相岑長倩納言歐陽通地官尙

書格輔元

三年正月親祀明堂春一月冬官尙書楊執柔同鳳閣鸞臺平章事三月五天竺國並遣使朝貢四月大赦天下改元爲如意禁斷天下屠殺秋七月大雨洛水汎溢漂流居人五千餘家遣使巡問賑貸八月魏王承嗣爲特進建昌王攸寧爲冬官尙書楊執柔爲地官尙書並罷知政事秋官侍郎崔元琮爲鸞臺侍郎夏官侍郎李昭德爲鳳閣侍郎檢校天官侍郎姚璿爲文昌左丞地官侍郎李元素爲文昌右丞並同鳳閣鸞臺平章事九月大赦天下改元爲長壽改用九月爲社大酺七日并州改置北都冬十月武威軍總管王孝傑大破吐蕃復龜茲于闐疎勒碎葉鎮

二年春一月親享明堂癸亥殺皇嗣妃劉氏竇氏臘月改封皇孫成器爲壽春郡王宜王成義爲衡陽郡王隆基爲臨淄郡王衛王隆範爲巴陵郡王隆業爲彭城郡王春二月尙方監裴匪躬坐潛謁皇嗣腰斬於都市秋九月上加金輪聖神皇帝號大赦天下大酺七日辛丑司賓卿豆盧欽望爲內史文昌右丞韋巨源同鳳閣鸞臺平章事秋官侍郎陸元方爲鸞臺侍郎同鳳閣鸞臺平章事

三年春一月親享明堂三月鳳閣侍郎李昭德檢校內史鸞臺侍郎蘇味道同鳳閣



鸞臺平章事韋巨源爲夏官侍郎依舊知政事四月夏官尙書王孝傑同鳳閣鸞臺三品五月上加尊號爲越古金輪聖神皇帝大赦天下改元爲延載大酺七日秋八月司賓少卿姚璿爲納言左肅政御史中丞楊再思爲鸞臺侍郎洛川司馬杜景儉爲鳳閣侍郎仍並同鳳閣鸞臺平章事梁王武三思勸率諸蕃酋長奏請大徵歛東都銅鐵造天樞於端門之外立頌以紀上之功業九月內史李昭德左授欽州南賓縣尉冬十月文昌右丞李元素爲鳳閣鸞臺平章事

證聖元年春一月上加尊號曰慈氏越古金輪聖神皇帝大赦天下改元大酺七日戊子豆盧欽望韋巨源杜景儉蘇味道陸元方並左授趙鄜集綏等州刺史丙申夜明堂災至明而並從煨燼庚子以明堂災告廟手詔責躬令內外文武九品已上各上封事極言正諫春二月上去慈氏越古尊號秋九月親祀南郊加尊號天冊金輪聖神皇帝大赦天下改元爲天冊萬歲大辟罪已下及犯十惡常赦所不原者咸赦除之大酺九日

萬歲登封元年臘月甲申上登封于嵩嶽大赦天下改元大酺九日丁亥禪于少室

山己丑又制內外官三品已上通前賜爵二等四品已下加兩階洛州百姓給復二年登封告成縣三年癸巳至自嵩嶽甲午親謁太廟春三月重造明堂成夏四月親享明堂大赦天下改元爲萬歲通天大酺七日以天下大旱命文武官九品以上極言時政得失五月營州城傍契丹首領松漠都督李盡忠與其妻兄媯誠州刺史孫萬榮殺都督趙文翽舉兵反攻陷營州盡忠自號可汗乙丑命鷹揚將軍曹仁師右金吾大將張玄遇右武威大將軍李多祚司農少卿麻仁節等二十八將討之秋七月命春官尙書梁王三思爲安撫大使納言姚璿爲之副制改李盡忠爲盡滅孫萬榮爲萬斬秋八月張玄遇曹仁師麻仁節與李盡滅戰于西硤石黃臺谷官軍敗績玄遇仁節並爲賊所虜九月命右武衛大將軍建安王攸宜爲大總管以討契丹并州長史王方慶爲鳳閣侍郎與殿中監李道廣並同鳳閣鸞臺平章事吐蕃寇涼州都督許欽明爲賊所執庚申王方慶爲鳳閣侍郎仍依舊知政事李盡滅死其黨孫萬斬代領其衆冬十月孫萬斬攻陷冀州刺史陸寶積死之十一月又陷瀛州屬縣二年正月親享明堂鳳閣侍郎李元素夏官侍郎孫元亨坐與綦連耀謀反伏誅原

州都督府司馬婁師德爲鳳閣侍郎同鳳閣鸞臺平章事春二月王孝傑蘇宏暉等率兵十八萬與孫萬斬戰于硤石谷王師敗績孝傑沒於陣宏暉棄甲而遁夏四月鑄九鼎成置于明堂之庭前益州大都督府長史王及善爲內史五月命右金吾大將軍河內王懿宗爲大總管右肅政御史大夫婁師德爲副大總管右武威衛大將軍沙吒忠義爲前軍總管率兵二十萬以討孫萬斬六月內史李昭德司業少卿來俊臣以罪伏誅孫萬斬爲其家奴所殺餘黨大潰魏王承嗣梁王三思並司鳳閣鸞臺三品秋八月納言姚璿爲益州大都督府長史九月以契丹李盡滅等平大赦天下改元爲神功大酺七日婁師德爲納言冬十月前幽州都督狄仁傑爲鸞臺侍郎司刑卿杜景儉爲鳳閣侍郎並同鳳閣鸞臺平章事

聖曆元年正月親享明堂大赦天下改元大酺九日春三月召廬陵王哲於房州夏五月禁天下屠殺突厥默啜上言有女請和親秋七月令淮陽王武延秀往突厥納默啜女爲妃遣右豹韜衛大將軍闍知微攝春官尙書赴虜庭八月突厥默啜以延秀非唐室諸王乃囚於別所率衆與闍知微入寇媯檀等州命司屬卿高平王重規

右武威衛大將軍沙吒忠義幽州都督張仁亶右羽林衛大將軍李多祚等率兵二十萬逆擊乃放延秀還己丑默啜攻陷定州刺史孫彥高死之焚燒百姓廬舍遇害者數千人魏王承嗣卒庚子梁王三思爲內史狄仁傑爲納言九月建昌王攸寧同鳳閣鸞臺平章事默啜攻陷趙州刺史高敞遇害丙子廬陵王哲爲皇太子令依舊名顯大赦天下大酺五日令納言狄仁傑爲河北道行軍元帥辛巳皇太子謁太廟天官侍郎蘇味道鳳閣侍郎同鳳閣鸞臺平章事癸未默啜盡殺所掠趙定州男女萬餘人從五迴道而去所至殘害不可勝紀冬十月夏官侍郎姚元崇麟臺少監李嶠並同鳳閣鸞臺平章事是月閻知微自突厥叛歸族誅之

二年春二月封皇嗣旦爲相王初爲寵臣張易之及其弟昌宗置控鶴府官員尋改爲奉宸府班在御史大夫下左肅政御史中丞魏元忠爲鳳閣侍郎吉頊爲天官侍郎並同鳳閣鸞臺平章事戊子幸嵩山過王子晉廟丙申幸緱山丁酉至自嵩山夏四月吐蕃大論贊婆來奔秋七月上以春秋高慮皇太子相王與梁王武三思定王武攸寧等不協令立誓文於明堂八月王及善爲文昌左相豆盧欽望爲文昌右相

仍並同鳳閣鸞臺三品冬十月乙亥幸福昌縣王及善薨

三年正月戊寅梁王三思爲特進天官侍郎吉頊配流嶺表臘月辛巳封皇太子男重潤爲召王狄仁傑爲內史戊寅幸汝州之温湯甲戌至自温湯造三陽宮于嵩山春三月李嶠爲鸞臺侍郎知政事如故夏四月戊申幸三陽宮五月癸丑上以所疾康復大赦天下改元爲久視停金輪等尊號大酺五日六月魏元忠爲左肅政御史大夫仍舊知政事是夏大旱秋七月至自三陽宮天官侍郎張錫爲鳳閣侍郎同鳳閣鸞臺平章事其甥鳳閣鸞臺平章事李嶠爲成均祭酒罷知政事壬寅制曰隋尙書令楊素昔在本朝早荷殊遇稟凶邪之德有詔佞之才惑亂君上離間骨肉搖動冢嫡寧唯握蠱之禍誘扇後主卒成請蹠之釁隋室喪亡蓋惟多僻究其萌兆職此之由生爲不忠之人死爲不義之鬼身雖幸免于竟族誅斯則姦逆之謀是爲庭訓險薄之行遂成門風刑戮雖加枝盾仍在何得肩隨近侍齒列朝行朕接統百王恭臨四海上嘉賢佐下惡賊臣常欲從容於萬機之餘褒貶於千載之外況年代未遠耳目所存者乎其楊素及兄弟子孫已下並不得令任京官及侍衛九月內史狄仁

傑卒冬十月甲寅復舊正朔改一月爲正月仍以爲歲首正月依舊爲十一月大赦天下韋巨源爲地官尙書文昌左丞韋安石爲鸞臺侍郎同鳳閣鸞臺平章事丁卯幸新安曲赦其縣壬申至自新安十二月開屠禁諸祠祭令依舊用牲牢

大足元年春正月制改元二月鸞臺侍郎李懷遠同鳳閣鸞臺平章事三月姚元崇爲鳳閣侍郎依舊知政事丙申鳳閣侍郎張錫坐賊配循州夏五月幸三陽宮命左肅政御史大夫魏元忠爲總管以備突厥天官侍郎顧琮同鳳閣鸞臺平章事六月夏官侍郎李迥秀同鳳閣鸞臺平章事辛未曲赦告城縣秋七月甲戌至自三陽宮九月召王重潤爲易之讒構令自死冬十月幸京師大赦天下改元爲長安

二年春正月突厥寇鹽夏等州殺掠人吏秋九月乙丑日有蝕之不盡如鈎京師及四方見之冬十月日本國遣使貢方物十一月相王旦爲司徒戊子親祀南郊大赦天下

三年春三月壬戌日有蝕之夏四月庚子相王旦表讓司徒許之改文昌臺爲中臺李嶠知納言事六月寧州雨水暴漲漂流二千餘家溺死者千餘人秋七月殺右

金吾大將軍唐休璟秋九月正諫大夫朱敬則鳳閣鸞臺平章事戊申相王旦爲雍州牧是月御史大夫兼知政事太子右庶子魏元忠爲張昌宗所譖左授端州高要尉京師大雨雹人畜有凍死者冬十月丙寅駕還神都乙酉至自京師

四年春正月造興泰宮於壽安縣之萬安山天官侍郎韋嗣立爲鳳閣侍郎同鳳閣鸞臺平章事朱敬則請致仕許之三月進封平恩郡王重福爲譙王夏官侍郎宗楚客同鳳閣鸞臺平章事夏四月韋安石知納言事李嶠知內史事丙子幸興泰宮六月天官侍郎崔玄暉同鳳閣鸞臺平章事李嶠爲國子祭酒知政事如故七月丙戌楊再思爲內史甲午至自興泰宮宗楚客左授原州都督八月姚元崇爲司僕卿知政事韋安石檢校揚州大都督府長史冬十月秋官侍郎張柬之同鳳閣鸞臺平章事十一月李嶠爲地官尙書張柬之爲鳳閣鸞臺平章事自九月至於是日夜陰晦大雨雪都中人有飢凍死者令官司開倉賑給

神龍元年春正月大赦改元上不豫制自文明元年已後得罪人除揚豫博三州及諸逆魁首咸赦除之癸亥麟臺監張易之與弟司僕卿昌宗反皇太子率左右羽林

軍桓彥範敬暉等以羽林兵入禁中誅之甲辰皇太子監國總統萬機大赦天下是日上傳皇帝位于皇太子徙居上陽宮戊申皇帝上尊號曰則天大聖皇帝冬十一月壬寅則天將大漸遺制祔廟歸陵令去帝稱則天大聖皇后其王蕭二家及褚遂良韓瑗等子孫親屬當時緣累者咸令復業是日崩于上陽宮之仙居殿年八十三諡曰則天大聖皇后二年五月庚申祔葬于乾陵睿宗卽位詔依上元年故事號爲天后未幾追尊爲大聖天后改號爲則天皇后太后嘗召文學之士周思茂范履冰衛敬業令撰玄覽及古今內範各百卷青宮紀要少陽政範各三十卷維城典訓鳳樓新誠孝子列女傳各二十卷內範要略樂書要錄各十卷百寮新誠兆人本業各五卷臣範兩卷垂拱格四卷并文集一百二十卷藏于秘閣

武宗

新唐書

武宗至道昭肅孝皇帝諱炎穆宗第五子也母曰宣懿皇太后韋氏始封潁王累加開府儀同三司檢校吏部尙書開成五年正月文宗疾大漸神策軍護軍中尉仇士良魚弘志矯詔廢皇太子成美復爲陳王立潁王爲皇太弟辛巳卽皇帝位于柩前



辛卯殺陳王成美及安王溶賢妃楊氏甲午始聽政追尊母爲皇太后二月乙卯大赦庚申有彗星出于室壁四月甲子大風拔木五月己卯楊嗣復罷諸道鹽鐵轉運使刑部尙書崔珙同中書門下平章事壬寅大風拔木六月丙寅以旱避正殿理囚河北河南淮南浙東福建蝗疫州除其徭七月戊寅大風拔木八月甲寅雨壬戌葬元聖昭獻孝皇帝于章陵內樞密使劉弘逸薛季稜以兵殺仇士良不克伏誅庚午李珣罷九月丁丑淮南節度副大使李德裕爲門下侍郎同中書門下平章事十月癸卯回鶻寇天德軍十一月戊寅有彗星出于東方魏博節度使何進滔卒其子重霸自稱留後十二月封子峻爲杞王

會昌元年正月己卯朝獻于太清宮庚辰朝享于太廟辛巳有事于南郊大赦改元三月御史大夫陳夷行爲門下侍郎同中書門下平章事七月有彗星出于羽林壬辰漢水溢九月癸巳幽州盧龍軍將陳行泰殺其節度使史元忠自稱知留務閏月幽州盧龍軍將張絳殺行泰自稱主軍務十月幽州盧龍軍逐絳雄武軍使張仲武入于幽州十一月壬寅有彗星出于營室辛亥避正殿減膳理囚罷興作癸亥崔鄆

罷

二年正月宋亳二州地震己亥李德裕爲司空回鶻寇橫水柵略天德振武軍二月  
丁丑淮南節度副大使李紳爲中書侍郎同中書門下平章事三月回鶻寇雲朔四  
月丁亥羣臣上尊號曰仁聖文武至神大孝皇帝大赦賜文武官階勳爵五月丙申  
回鶻唃沒斯降六月陳夷行罷河東節度使劉沔及回鶻戰于雲州敗績七月幸左  
神策軍閱武尚書右丞兼御史中丞李讓夷爲中書侍郎同中書門下平章事嵐州  
民田滿川反伏誅回鶻可汗寇大同川九月劉沔爲回鶻南面招撫使幽州盧龍軍  
節度使張仲武爲東面招撫使右金吾衛大將軍李思忠爲河西党項都將西南面  
招討使十月丁卯封子峴爲益王岐兗王十一月獵于白鹿原十二月封子嶧爲德  
王嵯昌王癸未京師地震

三年正月庚子天德軍行營副使石雄及回鶻戰于殺胡山敗之二月庚申朔日有  
食之辛未崔瑛罷是春大雨雪四月乙丑昭義軍節度使劉從諫卒其子稹自稱留  
後五月甲午震東都廣運樓災辛丑成德軍節度使王元逵爲北面招討澤潞使魏

博節度使何弘敬爲東面招討澤潞使及河中節度使陳夷行河陽節度使王茂元  
劉沔以討劉稹戊申翰林學士承旨中書舍人崔鉉爲中書侍郎同中書門下平章  
事武寧軍節度使李彥佐爲晉絳行營諸軍節度招討使六月西內神龍寺火辛酉  
李德裕爲司徒是夏作望仙觀于禁中七月庚子免河東今歲秋稅九月辛卯忠武  
軍節度使王宰兼河陽行營攻討使丁未以雨霖理囚免京兆府秋稅十月己巳晉  
絳行營節度使石雄及劉稹戰于烏嶺敗之壬午日中月食太白是月党項羌寇鹽  
州十一月寇邠寧克王岐爲靈夏六道元帥安撫党項大使御史中丞李回副之安  
南軍亂逐其經略使武渾十二月丁巳王宰克天井關

四年正月乙酉河東將楊弁逐其節度使李石二月甲寅朔日有食之辛酉楊弁伏  
誅三月石雄兼冀氏行營攻討使晉州刺史李丕副之六月己未中書門下御史臺  
慮囚閏七月壬戌李紳罷淮南節度副大使杜悰爲尙書右僕射兼中書侍郎同中  
書門下平章事丙子昭義軍將裴問及邢州刺史崔嘏以城降是月洛州刺史王釗  
磁州刺史安玉以城降八月乙未昭義軍將郭誼殺劉稹以降戊戌給復澤潞邢洛

磁五州一歲免太原河陽及懷陝晉絳四州秋稅戊申李德裕爲太尉十月獵于鄆縣十二月獵于雲陽

五年正月己酉羣臣上尊號曰仁聖文武章天成功神德明道大孝皇帝是日朝獻于太清宮庚戌朝享于太廟辛亥有事于南郊大赦賜文武官階勳爵文宣公二王三恪予一子出身作仙臺于南郊庚申皇太后崩三月旱五月壬子葬恭僖皇太后于光陵壬戌杜悰崔鉉罷乙丑戶部侍郎李回爲中書侍郎同中書門下平章事六月甲申作望仙樓于神策軍七月丙午朔日有食之是月山南東道節度使鄭肅檢校尙書右僕射同中書門下平章事八月壬午大毀佛寺復僧尼爲民十月作昭武廟于虎牢關

六年二月癸酉以旱降死罪以下免今歲夏稅庚辰夏綏銀節度使米暨爲東北道招討党項使三月壬戌不豫左神策軍護軍中尉馬元贄立光王怡爲皇太叔權勾當軍國政事甲子皇帝崩于大明宮年三十三

昭宗

哀帝

新唐書

昭宗聖穆景文孝皇帝諱曄懿宗第七子也母曰恭憲皇太后王氏始封壽王乾符三年領幽州盧龍軍節度使僖宗遇亂再出奔壽王握兵侍左右尤見倚信文德元年三月僖宗疾大漸羣臣以吉王長且欲立之觀軍容使楊復恭率兵迎壽王立爲皇太弟改名敏乙巳卽皇帝位于柩前四月戊辰孫儒陷揚州自稱淮南節度使楊行密奔于廬州庚午追尊母爲皇太后韋昭度爲中書令孔緯爲司空乙亥張全義陷孟州李罕之奔于河東成汭陷江陵自稱留後辛卯朱全忠及秦宗權戰于蔡州敗之五月壬寅趙德諲以襄州降以德諲爲忠義軍節度使蔡州四面行營副都統六月閬州防禦使王建陷漢州執刺史張頊遂寇成都韋昭度罷爲劔南西川節度副大使兼兩川招撫制置使十月陳敬瑄反辛卯葬惠聖恭定孝皇帝于靖陵十一月丙申秦宗權陷許州執忠武軍節度使王縝辛酉奉國軍將申叢執秦宗權十二月丁亥韋昭度爲行營招討使及永平軍節度使王建討陳敬瑄山南西道節度使楊守厚陷夔州

龍紀元年正月癸巳大赦改元翰林學士承旨兵部侍郎劉崇望同中書門下平章

事壬子宣武軍將郭璠殺奉國軍留後申叢自稱留後二月戊辰朱全忠俘秦宗權以獻己丑宗權伏誅三月孔緯爲司徒杜讓能爲司空丙申錢鏐陷蘇州逐刺史徐約六月李克用寇邢州昭義軍節度使孟方立卒其弟遷自稱留後楊行密陷宣州宣歙觀察使趙錙死之廬州刺史蔡儔叛附于孫儒八月甲戌孟遷叛附于李克用十月平盧軍節度使王敬武卒其子師範自稱留後陷棣州刺史張蟾死之宣歙觀察使楊行密陷常州刺史杜陵死之錢鏐陷潤州十一月丁未朝獻于太清宮戊申朝享于太廟己酉有事于南郊大赦十二月孫儒陷常潤二州戊午孔緯爲太保杜讓能爲司徒壬申眉州刺史山行章叛附于王建

大順元年正月戊子羣臣上尊號曰聖文睿德光武弘孝皇帝大赦改元壬寅簡州將杜有遷執其刺史員虔嵩叛附于王建二月己未資州將侯元綽執其刺史楊戡叛附于建三月戊申昭義軍節度使李克修卒其弟克恭自稱留後四月丙辰宿州將張筠逐其刺史張紹光丙寅嘉州刺史朱實叛附于王建丙子戎州將文武堅執其刺史謝承恩叛附于建五月張濬爲河東行營都招討宣慰使京兆尹孫揆副之

幽州盧龍軍節度使李匡威爲北面招討使雲州防禦使赫連鐸副之朱全忠爲南面招討使王鎔爲東面招討使以討李克用壬寅昭義軍將安居受殺其節度使李克恭叛附于朱全忠癸丑劔南東川節度使顧彥朗卒其弟彥暉自稱留後六月辛酉雅州將謝從本殺其刺史張承簡叛附于王建辛未朱全忠爲河東東面行營招討使是月河東將安知建以邢洺磁三州叛附于全忠七月楊行密陷潤州戊申李克用執昭義軍節度使孫揆八月錢鏐殺蘇州刺史杜孺休楊行密陷蘇州淮南節度使孫儒陷潤州庚午朱全忠爲中書令九月李克用陷潞州楊行密陷潤常二州閏月孫儒陷常州壬戌邛州將任可知殺其刺史毛湘十月癸未蜀州刺史李行周叛附于王建李克用陷邢洺磁三州十一月丁卯李匡威陷蔚州是月張濬及李克用戰于陰地敗績孫儒陷蘇州十二月李克用陷晉州

二年正月庚申孔緯張濬罷翰林學士承旨兵部侍郎崔昭緯御史中丞徐彥若爲戶部侍郎同中書門下平章事甘露鎮使陳可言陷常州錢鏐陷蘇州二月乙巳赦陳敬瑄丁未詔王建罷兵不受命是春淮南大饑四月庚辰有彗星入于太微甲申

大赦避正殿減膳徹樂賜兩軍金帛贖所略男女還其家民年八十以上及疾不能自存者長吏存郵訪武德功臣子孫癸卯王建寇成都五月孫儒陷和滌二州六月楊行密陷和滌二州丙午封子祐爲德王七月李克用陷雲州防禦使赫連鐸奔于退渾孫儒焚揚州以逃八月庚子王建陷成都執劍南西川節度使陳敬瑄自稱留後十月壬午朱全忠陷宿州十一月己未曹州將郭銖殺其刺史郭詞叛附于全忠辛未全忠陷壽州

景福元年正月己未朱全忠陷孟州逐河陽節度使趙克裕丙寅大赦改元二月劉崇望罷錢鏐陷蘇州甲申朱全忠寇鄆州天平軍節度使朱宣敗之三月戶部尙書鄭延昌爲中書侍郎同中書門下平章事乙巳楊行密陷楚州執刺史劉瓚又陷常州刺史陳可言死之丙辰武定軍節度使楊守忠龍劍節度使楊守貞會楊守厚兵寇梓州丙寅福建觀察使陳巖卒護閩都將范暉自稱留後庚午泉州刺史王潮寇福州四月辛巳杜讓能爲太尉六月戊寅楊行密陷揚州己巳鳳翔隴右節度使李茂貞陷鳳州感義軍節度使滿存奔于興元遂陷興洋二州八月壬申寇興元楊守



亮滿存奔于閩州丙戌降京畿關輔囚罪免淮南浙西宣州逋負十月蔡儔以廬州叛附于朱全忠河東將李存孝以邢州叛附于全忠十一月有星孛于斗牛辛丑武寧軍將張燧張諫以濠泗二州叛附于朱全忠乙巳朱友裕陷濮州執刺史邵儒孫儒將王壇陷婺州刺史蔣瓌奔于越州是歲明州刺史鍾文季卒其將黃晟自稱刺史

二年正月徐彥若罷爲鳳翔隴右節度使李茂貞爲山南西道節度使茂貞不受命二月楊行密陷常州三月辛酉幽州盧龍軍兵馬留後李匡籌逐其兄匡威自稱節度留後四月乙亥王建殺陳敬瑄及劍南西川監軍田令孜乙酉有彗星入于太微丁亥王鎔殺李匡威戊子朱全忠陷徐州武寧軍節度使時溥死之五月庚子王潮陷福州范暉死之潮自稱留後七月楊行密陷廬州蔡儔死之八月丙申嗣覃王嗣周爲京西路招討使神策大將軍李鐓副之以討李茂貞庚子昇州刺史張雄卒其將馮弘鐸自稱刺史是月楊行密陷歙州九月壬午嗣覃王嗣周及李茂貞戰于興平敗績甲申茂貞犯京師乙酉茂貞殺觀軍容使西門重遂內樞密使李周謹段詡

貶杜讓能爲梧州刺史壬辰東都留守檢校司徒韋昭度爲司徒御史中丞崔胤爲戶部侍郎同中書門下平章事是月昇州刺史馮弘鐸叛附于楊行密十月乙未殺杜讓能及戶部侍郎杜弘徽楊行密陷舒州十二月韋昭度爲太傅邵州刺史鄧處訥陷潭州欽化軍節度使周岳死之處訥自稱留後是歲建州刺史徐歸範汀州刺史鍾全慕叛附于王潮

乾寧元年正月有星孛于鶉首乙丑大赦改元李茂貞以兵來朝二月右散騎常侍鄭綮爲禮部侍郎同中書門下平章事彰義軍節度使張鈞卒其兄鐸自稱留後三月甲申李克用寇邢州執李存孝殺之五月丙子王建陷彭州威戎軍節度使楊晟死之是月鄭延昌罷孫儒將劉建鋒馬殷陷潭州武安軍節度使鄧處訥死之建鋒自稱留後武岡指揮使蔣勛陷邵州六月大同軍防禦使赫連鐸及李克用戰于雲州死之戊午翰林學士承旨禮部尙書李磻同中書門下平章事庚申磻罷御史大夫徐彥若爲中書侍郎同中書門下平章事七月以雨霖避正殿減膳鄭綮罷李茂貞陷閬州八月楊守亮伏誅癸巳滅京畿興元洋金商州賦役九月庚申李克用陷

潞州昭義軍節度使康君立死之十月丁酉封子祜爲棣王禊虔王禪沂王禕遂王十一月李克用陷武州十二月陷新州甲寅幽州盧龍軍節度使李匡籌奔于滄州義昌軍節度使盧彥威殺之丙辰李克用陷幽州是冬楊行密陷黃州執刺史吳討二年正月己巳給事中陸希聲爲戶部侍郎同中書門下平章事壬申護國軍節度使王重盈卒其子珂自稱留後二月乙未太子太傅李磻爲戶部侍郎同中書門下平章事三月崔胤李磻罷戶部侍郎判戶部王搏爲中書侍郎同中書門下平章事楊行密陷濠州執刺史張燧庚午河東地震四月蘇州大雨雪陸希聲韋昭度罷秦寧軍節度使朱瑾及朱全忠戰于高梧敗績其將安福慶死之楊行密陷壽州執刺史江從勗五月甲子靜難軍節度使王行瑜鎮國軍節度使韓建及李茂貞犯京師殺太保致仕韋昭度太子少師李磻是月李克用陷絳州刺史王瑤死之六月庚寅鎮海軍節度使錢鏐爲浙江東道招討使癸巳吏部尙書孔緯爲司空兼門下侍郎同中書門下平章事七月丙辰李克用以兵屯于河中戊午匡國軍節度使王行約奔于京師庚申左右神策軍護軍中尉駱全瓘劉景宣指揮使王行實李繼鵬反行

在莎城嗣薛王知柔權知中書事壬戌李克用陷同州甲子次石門前護國軍節度使崔胤爲中書侍郎同中書門下平章事八月戊戌李克用爲邠寧四面行營招討使保大軍節度使李思孝爲北面招討使定難軍節度使李思諫爲東北面招討使彰義軍節度使張鐸爲西面招討使辛丑李克用爲邠寧四面行營都統李繼鵬伏誅赦李茂貞辛亥至自石門壬子崔昭緯罷九月丙辰徐彥若爲司空癸亥孔緯薨前昭義軍節度使李罕之爲邠寧四面行營副都統十月京兆尹孫偓爲戶部侍郎同中書門下平章事丙戌李克用及王行瑜戰于梨園敗之庚寅王行約焚寧州以逃義武軍節度使王處存卒其子郅自稱留後十一月丁巳李克用及王行瑜戰于龍泉敗之辛酉衢州刺史陳儒卒其弟岌自稱刺史丁卯王行瑜伏誅壬申齊州刺史朱瓊叛附于朱全忠丁丑王建陷利州刺史李繼顛死之十二月癸未赦京師復大順以來削奪官爵非其罪者甲申閬州防禦使李繼雍蓬州刺史費存渠州刺史陳璠叛附于王建丙申建寇梓州戊辰通州刺史李彥昭叛附于建是歲安州防禦使宣晟陷桂州靜江軍節度使周元靜部將劉士政死之晟自稱知軍府事

三年正月癸丑王建陷龍州刺史田昉死之閏月丁亥果州刺史周雄叛附于建四月壬子武安軍亂殺其節度使劉建峯其將馬殷自稱留後五月癸未楊行密陷蘇州執刺史成及陷光州刺史劉存死之庚寅成汭陷黔州武泰軍節度使王建肇奔于成都乙未董昌伏誅是月蘄州刺史馮行章叛附于楊行密六月庚戌李茂貞犯京師嗣延王戒丕禦之丙寅及茂貞戰于婁館敗績七月癸巳行在渭北甲午韓建來朝次華州乙巳崔胤罷丙午翰林學士承旨尙書左丞陸扆爲戶部侍郎同中書門下平章事八月甲寅王搏罷乙丑國子毛詩博士朱朴爲左諫議大夫同中書門下平章事九月乙未武安軍節度使崔胤爲中書侍郎翰林學士承旨戶部侍郎崔遠同中書門下平章事丁酉貶陸扆爲峽州刺史十月李克用及羅弘信戰于白龍潭敗之壬子孫偓持節鳳翔四面行營節度諸軍都統招討處置使戊午威勝軍節度使王搏爲吏部尙書同中書門下平章事十一月戊子忠國軍節度使李師悅卒其子繼徽自稱留後

四年正月乙酉韓建以兵圍行宮殺扈蹕都將李筠丙申朱全忠陷鄆州天平軍節

度使朱宣死之己亥孫僱罷都統二月朱全忠寇兗州泰寧軍節度使朱瑾奔于淮南其子用貞以兗州叛附于全忠全忠陷沂海密三州保義軍節度使王珙寇河中韓建殺太子詹事馬道殷將作監許巖士楊行密爲江南諸道行營都統癸丑王建陷瀘州刺史馬敬儒死之己未立德王裕爲皇太子大赦饗于行廟辛未王建陷渝州乙亥孫僱朱朴罷五月壬午朱全忠陷黃州刺史夔璋死之六月貶王建爲南州刺史以李茂貞爲劍南西川節度使嗣覃王嗣周爲鳳翔隴右節度使茂貞不受命嗣周及茂貞戰于奉天敗績八月韓建殺通王滋沂王禋韶王彭王嗣韓王嗣陳王嗣覃王嗣周嗣延王戒丕嗣丹王允九月錢鏐陷湖州忠國軍節度使李繼徽奔于淮南彰義軍節度使張璉爲鳳翔西北行營招討使靜難軍節度使李思諫爲鳳翔四面行營副都統以討李茂貞十月壬子遂州刺史侯紹叛附于王建乙卯合州刺史王仁威叛附于建庚申建陷梓州劍南東川節度使顧彥暉死之甲子封子秘爲景王祚輝王祺祁王十一月癸酉楊行密及朱全忠戰于清口敗之丙子錢鏐陷台州十二月丁未威武軍節度使王潮卒其弟審知自稱留後

光化元年正月徐彥若爲司徒二月赦李茂貞三月幽州盧龍軍節度使劉仁恭之  
子守文陷滄州義昌軍節度使盧彥威奔于汴州四月丙寅立淑妃何氏爲皇后五  
月己巳大赦辛未朱全忠陷洛州刺史邢善益死之又陷邢州壬午陷磁州刺史袁  
奉韜死之是月馬殷陷邵衡永三州刺史蔣勛楊師遠唐旻死之七月丙申朱全忠  
陷唐州又陷隋州執刺史趙匡璘八月戊午陷鄧州執刺史國湘壬戌至自華州甲  
子大赦改元九月丙子有星隕于北方甲申錢鏐陷蘇州十月魏博節度使羅弘信  
卒其子紹威自稱留後己亥朱全忠陷安州刺史武瑜死之十一月衢州刺史陳岌  
叛附于楊行密甲寅封子禛爲雅王祥瓊王十二月癸未李罕之陷潞州自稱節度  
留後李克用陷澤州

二年正月乙未給復綿劍二州二年丁未崔胤罷兵部尙書陸扈中書門下平章  
事是月李罕之陷沁州劉仁恭陷貝州二月甲子朱全忠陷蔡州奉國軍節度使崔  
洪奔于淮南三月丁巳全忠陷澤州六月丁丑保義軍亂殺其節度使王珙其將李  
璠叛附于全忠七月壬辰海州戍將陳漢寶以其州叛附于楊行密馬殷陷道州刺

史蔡結死之八月李克用陷澤潞懷三州十一月徐彥若爲太保王搏爲司空馬殷陷郴連二州刺史陳彥謙魯景仁死之辛丑保義軍將朱簡殺其節度使李璠叛附于朱全忠

三年四月辛未皇后及皇太子享於太廟六月丁卯清海軍節度使崔胤爲尙書左僕射兼門下侍郎同中書門下平章事王搏罷己巳殺之七月浙江溢八月庚辰李克用陷洛州執刺史朱紹宗九月朱全忠陷洛州錢鏐陷婺州刺史王壇奔于宣州衢州刺史陳岌叛附于錢鏐乙巳徐彥若罷丙午崔遠罷戊申刑部尙書裴贇爲中書侍郎同中書門下平章事甲寅朱全忠陷瀛州十月丙辰陷景州執刺史劉仁霸辛酉陷莫州辛巳陷祁州刺史楊約死之甲申陷定州義武軍節度使王郜奔于太原十一月己丑左右神策軍中尉劉季述王仲先內樞密使王彥範薛齊偃作亂皇帝居于少陽院辛卯季述以皇太子裕爲皇帝丁未太白晝見十二月劉季述殺睦王倚是歲馬殷陷桂宜巖柳象五州睦州刺史陳晟卒其弟詢自稱刺史

天復元年正月乙酉左神策軍將孫德昭董彥弼周承誨以兵討亂皇帝復于位劉



季述薛齊偃伏誅降封皇太子裕爲德王戊申朱全忠陷絳州壬子崔胤爲司空朱全忠陷晉州二月甲寅以旱避正殿減膳戊辰朱全忠陷河中執護國軍節度使王珂辛未封全忠爲梁王是月翰林學士戶部侍郎王溥爲中書侍郎吏部侍郎裴樞爲戶部侍郎同中書門下平章事三月辛亥昭義軍節度使孟遷叛附于朱全忠四月壬子全忠陷沁澤二州丁巳儀州刺史張鄂叛附于全忠甲戌享于太廟丙子大赦改元武德貞觀配饗功臣主祭子孫叙進之介公鄴公後予一子九品正員官免光化以來畿內逋負五月李茂貞來朝六月李克用陷隰慈二州十月戊戌朱全忠犯京師十一月己酉陷同州壬子如鳳翔丁巳朱全忠陷華州鎮國軍節度使韓建叛附于全忠辛酉兵部侍郎盧光啓權句當中書事癸亥李茂貞及朱全忠戰于武功敗績丁卯盧光啓爲右諫議大夫參知機務戊辰朱全忠犯鳳翔辛未陷邠州靜難軍節度使李繼徽叛附于全忠甲戌崔胤裴樞罷十二月鍾傳陷吉州是歲清海軍節度使徐彥若卒行軍司馬劉隱自稱留後武貞軍節度使雷蒲卒其子彥威自稱留後

二年正月丁卯給事中韋貽範爲工部侍郎同中書門下平章事丙子給事中嚴龜爲汴岐和協使二月己亥盜發簡陵王建陷利州昭武軍節度使李繼忠奔于鳳翔三月庚戌晝晦癸丑朱全忠陷汾州乙卯浙西大雨雪戊午朱全忠陷慈隰二州丁卯李克用陷汾慈隰三州四月盧光啟罷丙申温州刺史朱褒卒其兄敖自稱刺史楊行密陷昇州五月丙午李茂貞及朱全忠戰于武功敗績庚午韋貽範罷六月丙子中書舍人蘇檢爲工部侍郎同中書門下平章事丙戌朱全忠陷鳳州七月甲辰陷成州乙巳陷隴州八月己亥韋貽範起復辛丑王建陷興元山南西道節度使王萬弘叛附于建九月戊申李茂貞及朱全忠戰于槐林敗績武定軍節度使拓拔思恭叛附于王建十月癸酉楊行密爲東面諸道行營都統及湖南節度使馬殷討朱全忠王建陷興州十一月癸卯保大軍節度使李茂勳以兵援鳳翔丙辰韋貽範薨十二月癸巳温州將丁章逐其刺史朱敖己亥朱全忠陷鄆州保大軍節度使李茂勳叛附于全忠是歲盧光稠陷韶州岳州刺史鄧進思卒其弟進忠自稱刺史

三年正月丙午平盧軍節度使王師範取兗州戊申殺左右神策軍護軍中尉韓全

誨張彥弘內樞密使袁易簡周敬容辛亥翰林學士姚洎爲汴岐和協使壬子工部  
尙書崔胤爲司空兼門下侍郎同中書門下平章事甲子幸朱全忠軍己巳至自鳳  
翔哭于太廟大赦庚午崔胤及朱全忠殺中官七百餘人辛未胤判六軍十二衛事  
丁章伏誅二月雨土甲戌貶陸扆爲沂王傅分司東都丙子王溥罷朱全忠殺蘇檢  
吏部侍郎盧光啓戊寅降京畿河中鳳翔興德府同邠鄜三州死罪以下己卯輝王  
祚爲諸道兵馬都元帥庚辰朱全忠爲太尉中書令副之崔胤爲司徒乙未清海軍  
節度使裴樞爲門下侍郎同中書門下平章事三月朱全忠陷青州楊行密陷密州  
刺史劉康乂死之四月己卯朱全忠判元帥府事五月壬子荆南節度使成汭及楊  
行密戰于君山死之武貞軍節度使雷彥威之弟彥恭陷江陵六月乙亥朱全忠陷  
登州九月楊行密殺奉國軍節度使朱延壽辛亥朱全忠陷棗州刺史邵播死之陷  
密州戊午平盧軍節度使王師範叛附于全忠十月忠義軍將趙匡明陷江陵自稱  
留後王建陷忠萬施三州甲戌陷夔州丁丑平盧軍將劉鄩以兗州叛附于朱全忠  
十二月裴贄罷楊行密陷宣州寧國軍節度使田頴死之辛巳禮部尙書獨孤損爲

兵部侍郎同中書門下平章事丙申朱全忠殺尙書左僕射致仕張濬

天祐元年正月乙巳崔胤罷裴樞判左三軍事獨孤損判右三軍事兵部尙書崔遠爲中書侍郎翰林學士右拾遺柳璨爲右諫議大夫同中書門下平章事己酉朱全忠殺太子少傅崔胤及京兆尹鄭元規威遠軍使陳班戊午全忠遷唐都于洛陽二月丙寅日中見北斗戊寅次陝州朱全忠來朝甲申封子禎爲端王祁豐王福和王禧登王祐嘉王三月丁未朱全忠兼判左右神策及六軍諸衛事閏四月壬寅次穀水朱全忠來朝甲辰至自西都享于太廟大風雨土乙巳大赦改元六月靜難軍節度使楊崇本會李克用王建兵以討朱全忠七月乙丑全忠以兵屯于河中八月壬寅全忠以左右龍武統軍朱友恭氏叔琮樞密使蔣玄暉兵犯宮門是夕皇帝崩年三十八明年起居郎蘇楷請更諡恭靈莊閔廟號襄宗至後唐同光初復故號諡云昭宣光烈孝皇帝諱祝昭宗第九子也母曰皇太后何氏始封輝王朱全忠已弑昭宗矯詔立爲皇太子監軍國事

天祐元年八月丙午卽皇帝位于柩前衢州刺史陳璋睦州刺史陳詢叛附于楊行

密九月庚午尊皇后爲皇太后十月辛卯朔日有食之癸巳朱全忠來朝甲午全忠殺朱友恭氏叔琮十一月全忠陷光州是歲虔州刺史盧光稠卒衙將李圖自稱知州事

二年正月盧約陷温州楊行密殺平盧軍節度使安仁義丁丑盜焚乾陵下宮二月楊行密陷鄂州武昌軍節度使杜洪死之戊戌朱全忠殺德王禕及棣王祜虔王禩遂王禕景王秘祁王祺瓊王祥己酉葬聖穆景文孝皇帝于和陵三月甲子裴樞罷戊寅獨孤損罷禮部侍郎張文蔚同中書門下平章事甲申崔遠罷吏部侍郎楊涉同中書門下平章事四月乙未以旱避正殿減膳庚子有彗星出于西北甲辰出于北河辛亥降京畿死罪以下給復山陵役者一年五月王建陷金州戎昭軍節度使馮行襲奔于均州六月行襲克金州楊行密陷婺州執刺史沈夏戊子朱全忠殺裴樞及靜海軍節度使獨孤損左僕射崔遠吏部尙書陸扆工部尙書王溥司空致仕裴贄檢校司空兼太子太保致仕趙崇兵部侍郎王贊七月卜郊岳州刺史鄧進忠叛附于馬殷九月甲子朱全忠陷襄州忠義軍節度使趙匡凝奔于淮南丙寅封弟

裕爲穎王祐蔡王朱全忠陷江陵留後趙匡明奔于成都乙酉改卜郊十月丙戌朱全忠爲諸道兵馬元帥十一月庚午三卜郊庚辰淮南節度使楊行密卒以其子渥爲淮南節度副大使東面諸道行營都統辛巳朱全忠爲相國總百揆封魏王十二月乙未全忠爲天下兵馬元帥殺蔣玄暉及豐德庫使應瑒尙食使朱建武癸卯柳璨爲司空戊申朱全忠弑皇太后辛亥罷郊癸丑貶柳璨爲登州刺史甲寅殺璨及太常卿張廷範

三年正月壬戌淮南將王茂章以宣歙二州叛附于錢鏐二月楊渥陷岳州癸巳王建陷歸州四月癸未朔日有食之鎮南軍節度使鍾傳卒其子匡時自稱留後六月錢鏐陷衢睦二州刺史陳璋陳詢奔于淮南七月楊渥陷饒州八月癸未朱全忠陷相州九月楊渥陷洪州執鍾匡時乙亥匡國軍節度使劉知俊陷坊州執刺史劉彥暉十月辛巳楊崇本會鳳翔涇原鄜延秦隴兵以討朱全忠戰于美原敗績十一月忠國軍節度使高彥卒其子澧自稱留後閏十二月戊辰李克用陷潞州昭義軍節度使丁會叛附于克用乙亥震電雨雪

四年三月劉守光囚其父仁恭自稱幽州盧龍軍節度使四月戊午錢鏐陷温州甲子皇帝遜于位徙于曹州號濟陰王梁開平二年二月遇弑年十七諡曰哀帝後唐明宗追諡昭宣光烈孝皇帝陵曰溫陵